





省齋文集卷二十一

周益文忠公集二十



啟一

權零都尉回交代嚴縣尉第啟

紹興二十二年

伏審拜恩北闕佐邑南州膠大舟於堂坳雖非得地始
 千里於足下是亦假塗拜榮問之有華激感悰而無藝
 伏惟某官浩養至大懿文在中早隱釣臺不愧子陵之
 後晚言世務蔚居徐樂之先謂宜入校丙丁四部之書
 云胡出領東南一尉之任蓋孔子嘗為委吏而下惠不
 辭小官惟我老成素明此道顧於職業何如耳豈以尊
 卑異乎哉偉績苟聞峻除奚後某成家學淺試吏術疎

昔仰堅高阻山川之跋履茲緣承攝煩糠粃之簸揚望見非遙瞻馳更切

賀沈相啟

紹興二十六年

伏審誕布策書進持魁柄高宗得說迪我后以康兆民尹躬暨湯享天心而有一德甄陶伊始老稚注觀竊惟極治之時斯有非常之佐如風雲之從龍虎勢益必然若手足之視腹心理難偏廢猗與盛事屬我熙朝恭惟某官道覺民先智周物表精微內蘊有移風易俗之心事業外彰皆尊主庇民之術蚤經聖神之眷偏揚嚴近之班宣勞再總於十連注意彌隆於萬乘吾不見賈俄

興宣室之思佞果召參遂理舍人之橐促登文陛晋陟政塗上方虛己以仰成公則竭誠而入輔威名行遠蠻夷問裴度之年盛德在人朝野望揚公之相式符帝賚首冠台躔總萬幾繁委之權宅左揆辨章之任耻君不及堯舜昔聞仁義之談致治庶幾成康今展經綸之志廊廟增重華戎具依某擊柝官微挈瓶智小當巖石維新之日亦併蒙受賜之人開孫閣以延賢知難遠跡掃齊門而求見庶遂執鞭欣幸交深編摩奚究

中博宏謝左相啟

紹興二十七年三月

藝苑三年僅刻宋人之楮詞源八月誤乘漢客之槎脫

銓曹守選之勞假留府談論之任衆以叨榮而指目心
知踰分以兢慚竊惟宏博之科實待譽髦之士秦陵致
治首舉彞章寧考繼猷率循故事逮聖皇之御極參唐
制以正名昔旄頭基於紫薇尚勤博採茲東壁明於秋
府益慎詳延試言雖附於春官擬制實闕於睿覽惟大
冊高文之有體豎洽聞殫見以無遺乃能合程度之嚴
或可備甄收之教如某者生而孤露長則蠢冥坦：吁
吁屢欲乞天孫之巧竒：怪：固嘗送文鬼之窮幸承
素業於百年早竊清朝之一第既迫淵明之為米寧辭
蕭傅之抱閨說化鵬飛絕望南溟之從猿驚鶴怨空負

北山之移鬢雖未點於吳霜夢已不生於春草嗟子厚
方心之靡鑿昧淳于曲突之告鄰回祿祝融帳廬垣之
黔赭孤臣孽子宜搽慮之危深繙舊書於忘廢之餘輯
冗語於荒蕪之後但勵疲駑而自進其如糞朽之難鑄
未能知祭公謀父之詩况於補聖曆侍臣之贊濫巾雋
軌整轡文場劇目鉢心無鈎章之間見汗顏血指愧巧
匠之旁觀兩端即叩於鄙夫千慮遂殫於愚者謂占小
善率以錄容或得之若諸大夫皆曰賢益無是也方笑
黔驢之伎盡旋驚塞馬之福來幸固自天恩豈無地茲
益伏遇某官經邦哲輔命世真儒道德致君美化漸摩

於庶俗文章入相餘波霑丐於群材遂容凡下之資猥
被作成之賜寵之所至懼亦難任再念哀宗夙叨雅契
王父中庚辰之第拜先正於龍門嚴君登戊戌之科踵
後塵於虎榜夫何小醜復玷大鈞既祖孫三世以依歸
殆今昔一時之幸會某謹當深思忝冒益務進脩應義
理之文敢繼嚴助教皋之作鳴國家之盛願追李翱張
籍之風過此以還未知所措

湯樞思退頌德

此蓋伏遇某官道該皇極德冠倫魁紫樞資宥密之謀
黃屋厚弼諧之眷願調鼎已臻於儒效而化成正藉於
人文俾多士之知歸繫宗工之是賴夫何小醜亦播大
鈞靜焉僥倖之來盡出作成之賜

陳樞誠之頌德

某官溫良而剛毅廣博而粹純任專總於樞機望兼隆
於夷夏起千年之絕學羽翼聖經振一代之脩名範模
士類有如固陋亦預作成重念孤踪實深榮遇稱韓門
之弟子昔已玷於品題用魯國之真儒今復歸於陶冶
某敢不仰銜恩施增激懦衷

吏部劉尚書才邵頌德

某官學閔百聖氣蓋諸公天官高玉笋之班翰苑煥金

蓮之炬行躋政路參幹化鈞每推轂於人才用主盟於
吾道眷言小醜初乏寸長自王父之宦遊樂廬陵之風
土桐鄉民吏已興朱邑之祠揚氏子孫遂占巴江之籍
既獲附詩人之彙梓因粗聞夫子之文章奏薄技於一
時固無取者踵大名於三紀預有榮焉第非吐鳳之詞
寧免續貂之誚某謹當

下有闕

戶部王侍郎侯頌德

某官學閔百聖望重三朝善教得民豈特率地官之屬
懿文經國又將為王度之華每汲：於群材尤憐：於
寒畯自惟小醜久仰高山念昔先君嘗依仁於姻婭眷
言世父仍託契於子孫既平時師慕以惟勤宜今日作
成之有賴

同知舉中書王舍人綸頌德

某官道閔百聖氣蓋諸公黼黻之詞主盟吾道淵源之
學砥柱頽波以西垣視草之臣專南省持衡之柄先收
駑緩用來汗血之駒不棄珉中将致截肪之寶第慚庸
陋有玷品題流聞道路之言嘗有愛憎之論既求瘼而
責備幾刑足以包羞非宗工力賜於主張在小醜難逃
於汰斥念得失士夫之常理而去留冰鑑之何心所欣
獲遇於已知豈曰自矜於幸得某敢不

云

同知舉左史趙舍人達頌德

某官道闋百聖氣益諸公問學淵源其來也遠詞章黼
黻有出斯長以珥筆之近臣付持衡之重寄先收下駟
用來汗血之駒不棄中珉將致截肪之寶第慚淺陋莫
副搜揚重念鯢生實深榮遇頃緣賜第聽大名於九陛
之間今賴知音塵兩科於六年之後某敢不仰銜恩施
增激懦衷

葉校書謙亨啟

科目宏開適在彌文之日雋髦並進猥收極陋之姿惟
名實之未孚宜兢慚之併集伏念某少知勵業長昧通

方意甚廣而才疎力雖多而效寡念累世擢漢廷之第
而百年傳韋氏之經施及先君早魁群彥未縱青萍之
靶俄成白玉之樓藐焉孤童但欲歸耕於南畝墜此素
業又思干祿於明時竊末第以承家省微躬而知幸博
扶搖而上九萬里望絕飛舉管庫之士七十家誰為
推轂旋值融風之厄莫施暝雨之功黔其廬楮其垣雖
焦頭之不免息我黥補我劓幸尊足之猶存勉輯舊聞
來趨大敵况先達具存於矜式俾後來咸識於指歸馳
驅駕駕之追淬礪鉛刀之割畫不成而類狗幾貽下執
事之羞墨誤點而為蠅實賴良有司之鑒茲益伏遇某

官名冠文章之籙望隆德行之科杖對青藜姑校文於
東觀塔翻紅藥罈演誥於西臺親承黃屋之知參預文
闡之柄去取莫逃於絕識是非舉合於輿言夫何未至
之蹤亦免汰歸之辱某敢不愈勤聚辨小補荒蕪牧羊
不廢於讀書奚恤止羊之患得馬靡矜於為福更思失
馬之時

賀湯叅政啓春

伏審光膺帝命入秉政機舍我其誰方待孟軻之治比
予於是敢論管仲之卑紫誥誕頒黃扉增重歷代祖宗
之世莫難輔弼之臣既知其勲業之優猶俟以歲時之

久或尹釐京邑觀恢：應務之才或枰劾憲臺試稟：
排姦之勇逮名實具孚而無間故廟堂登進而無疑用
能成一時莫大之功亦復播後世無窮之聞克遵舊制
允屬今王恭惟某官學該流畧而得其宗氣塞堪輿而
集以義松筠之操傲睨歲寒金玉之辭丹青王度隆異
知於萬乘馳英譽於四方備歷險夷徧更中外持節則
澄清之効著牧民而惠愛之績聞治劇日畿漢廷臣無
出右者輸忠霜簡古烈士何以加哉屢發白獸之樽旋
侍金華之讀予惟克邁乃訓久入告於嘉猷天將大任
任是人果參陪於揆路仰中階之炳煥問兩社以雍容

蓋經綸素定於胸中故風采想聞於天下俾后惟堯舜
昔聆伊尹之言致治幾成康行見鄭公之効盛德所在
烝民注觀弼我不基將億萬斯年之有賴錫公純嘏何
二十四考之足云某甫出師門遽依陶冶念遠俟葵立
之戎欲歸尋菊徑之荒解北山猿鶴之嘲雖寢遙於東
閣備太史馬牛之走豈無望於洪鈞欣頌之私敷陳罔
既

賀湯右相啟

秋

鵷序班庭聳聞大號鳳池宅揆首屬真儒萬邦新巖石
之瞻九廟壯覆盂之勢王民皞：喜色欣：竊以君莫

大於知人國尤難於置相惟高宗之得說若尹躬之暨
湯非天私我有商祐於一德夢帝賚予良弼正於四方
豈惟占卿士之從亦復契神祇之望自時厥后振古如
茲逮皇家開不拔之基將二百載凡公府措非常之輔
餘八十人觀祖宗功德之隆知輔弼贊襄之盛方上聖
勵精之今日實群工協力之昌期遠虛右拂之辨章有
待清朝之英傑考慎久矣延登在斯恭惟某官九德備
躬千齡應運淵渟嶽峙凜漢相之威儀玉式金相妙臬
謨之述作粵濯纓而入仕即結綬以登畿常近城南尺
五之天不離玉階方寸之地備密訪於北門之邃總神

幾於西府之嚴言仁義於前茅見欽王之孟子順謀猷
於外誰知告后之君陳及聞顓面以正朝始信同心而
合意昔漢嘗尊於匡鼎至唐亦重於鄭覃皆以儒宗結
於帝眷進擢遂居於台路委蛇靡出於脩門偉治世之
登庸掩前聞而增賁而况沙堤甫築玉燭遽調正炎威
稍兆於常暘俄膏澤有聞於豐歲天瑞示汝霖之作宮
童訛德雨之呼方且致主華勳躋時仁壽如太公宜生
見而知者豈管仲晏子可復許哉與國咸休固億萬斯
年之允賴錫公純嘏何二十四考之足云某推鈍無堪
塗窮已甚朝遠湏於泮水貧屢貸於監河幸大鈞方播

於無垠肆小子或容於有造借之春色倘參桃李之濃
陰報以歲寒敢廢松筠之勁節永言欣頌倍百常均

賀玉德言除工侍啟

伏審擢登起部仍直鑿坡閭闔晨趨班冠貳卿之玉笋
絲綸夜草燭搖內相之金蓮增王度之光華聳儒流之
觀聽恭惟某官性誠明而守之正氣剛大而養以和學
有師承何止八索九丘之徧讀詞皆已出故雖六戎五
狄以爭傳比開大道之公肯奉正衙之對內外獨司於
帝制緝熙兼助於皇猷詰屈聳牙備周誥商盤之體條
貫義例發聖經賢傳之端洗萬古而空之擅一時之作

者咸後槐庭之直上云何蘭省之斜飛俯酌輿言仰窺
睿意蓋南臺清切昔已裁於豸冠而兩禁深嚴茲又儀
於鳳沼惟是丹屏六曹之職實基文昌萬化之源觀近
者之諸公率由茲而大用聊復假途於踐歷示將當路
以弼諧遜於艾斯伯與莫及咨垂之命有若伊陟臣扈
佇成格帝之功其本無他長適有天幸陋如嫫母已游
冰鑿之中鑄彼鑄錡即在陶鈞之下

赴金陵教官與張帥啟

紹興二十八年正月

期曲江之集先君昔附於英纏充泮水之員賤子今塵
於屬吏遙溯翹材之館虔脩執訊之書恭惟某官九德

備躬千齡應運學窺奧突邁揚雄荀况之未醇志蘊經
綸豈管仲晏嬰之可許早標纓於華貫旋飛鞚於從班
星掖敷綸言語妙於天下文昌帥屬仁義陳於王前十
年身在於江湖一日天披於雲霧盍游鳳沼間兩社以
弼諧尚綰麟符釐東郊而鎮撫黔首樂慈祥之政青衿
臻儒雅之風鴉已化於集林久詠魯侯之戾止鴻不宜
於遵渚當趣我公之歸兮伏念某佔俾腐儒挈瓶小器
暖、昧、而自悅涼、踽、以何為叨一第於集英効
微官於省局職閒無事欽所好也方安斥鷃之飛屋比
延燒黜往視之遽困畢方之崇既被誣於京兆甘守選

於銓曹未嘗蹊田而奪牛人皆知此俄使無心而得馬
天寶為之濫叨掌教之官靡俟踰年之次豈特揖上官
而褻章服遂將隨先生而息劓黥夫何極陋之資有此
非常之幸雖無絕識能窺孔子之高堅願與諸生共頌
王褒之宣布

方總領啟

結綬登畿久處司存之下采芹在泮又居臺治之中望
繡斧以馳心寓鱗鴻而注記恭惟某官學洞九流而得
其樞要文高八代而振以英竒靡由推轂之先容自結
凝旒之厚眷於今江左視漢關中龍蟠雄天整之都虎

踞儼雲屯之衆比掄才於省戶就總賦於轅門解數千
牛而刃若新既多餘地上九萬里則風在下方快圖南
狩頌內史之贊書歸挈甘泉之從橐伏念某零丁哀結
彳亍孤踪昨俯隸於嚴明蒙曲加於眄睐職閒無事欽
所好也方安斥鷃之飛屋比延燒黯往視之俄因畢方
之崇京兆之誣既酷丹書之責奚逃踰年悵遠於聲光
指日復依於博約黔廬楮垣之相吾子尚何怨於祝融
息黥補劓以隨先生願最忘於造物泣寒在序視履多
祥冀加慎於保調庸仰承於眷倚

鄧漕啟

一官効智謬瞻魯泮之芹三月聚糧期御范車之轡曳
履未干於賓贊飛絨先惠於典籤共惟某官節勁而氣
和道隆而德駿名在文章之籙才高政事之科漢石二
千幡蓋屢煩於共理齊鵬九萬雲霄方快於圖南上攜
李之銀菟付江畿之金節明能激濁雪見睨而曰消化
足移人草上風而必偃發軒既高於驪駕持荷即蓮於
鵷班伏念某佔俾心勤窺天見小有麀鼠怯踰之態無
鯨鯨吐擲之才念百年薰編簡之香懼一旦墜箕裘之
業雖微師授勉讀父書叨逢昭代之右文游冒末科而
干祿養其楛棘正恐為小人之儒舍爾靈龜安能司桐

子之命孰謂黃緣之至乃居提按之中設鄉校而為文
章講導正資於常衮即學官而問得失清平願美於君
公

李倅啟

結綬王畿久近即官之列宿采芹泮水載瞻別駕之前
星敢遡賓鴻遠傳疊繭恭惟某官鍾英相闕振藻儒林
濯：祥麟為聖人而出也鏘：鳴鳳覽德輝而下之入
承雨露之恩浸展雲霄之步去天尺五含香已直於蘭
闈同德三千簪筆盍陪於荷橐遽高易退自詭外遷輟
文部之華資列陪都之副尹王祥政美方著詠於海沂

賈誼名高卽召遷於宣室某承家學淺試吏術踈竊一第於太常効微官於省局職閒無事欽所好也方安斥鷃之飛屋比延燒黯往視之遽因畢方之崇京兆之誣既酷丹書之責奚逃踰年悵遠於聲光指日復參於僚屬事大夫之賢者既仰賴於併懍雖小道有觀焉願俯彈於鴛鴦

周倅啟

十步飛蠅望驥騰而有素一班窺豹思管見以無階茲叨泮水之遊乃託貳車之庇念登門之甚適詎奏記之敢稽恭惟某官材能為當代之師儒術得古人之旨世種陰德其積也長仕際明時所居則大京兆已高於佐理留都更屈於治中雄銜剖劇以風生美化加民而草偃歲時甫爾謠頌藹然帝眷王舒詳試頻參於望府士推嚴助共期留侍於承明某涉世才踈傳家學僻望洋而嘆誰為發於醯雞佔俾而伸自亦憐其書蠹猥冒恩於魏闕容備數於儒宮方春百里之糧往効一官之智事大夫之賢者幸仰托於併懍雖小道有觀焉願俯彈於鴛鴦

同官蔡從事理啟

比叨宸命並列儒官披雲霧以觀天雖諧素願用兼葭

而倚玉寧免厚顏念將佐於下風盍自通於先進恭惟
其官氣由直養業以勤精繙十二經而學殖滋豐草三
千牘而詞源未竭策奉常之高第蜚雋軌之英聲分教
東都誰謂久淹於韓愈別為七畧殆將趣召於劉歆某
用乏三冬體荒四業真孤陋寡聞之學非遊觀廣覽之
知正恐為小人之儒安能司桐子之命賴餘光之可借
庶賸馥之能需叨甚江公敢並通經之持論思精鄭氏
定容閣筆之同僚欣幸居多叙陳罔既

回句容胡主簿大中啓

二月

伏審遠勤稱妮來王鈞稽念百里之得賢知四民之交

慶伏惟某官英聲籍甚游刃恢然謂宜掉鞅於華途聊
復問津於支邑才無不可定為韓滉之竒道或能行豈
害子嚴之悅矧對茅峯之勝毋辭枳棘之卑某舊阻盍
簪今遲傾蓋悵占書之未果辱流問之相先感愧交懷
叙陳奚既

謝到任啟

文場被選已慚崔氏之美庄釁舍充員復近鄭公之道
德星言命駕晨也入官欲陳一介之愚盍致小夫之牘
伏念某最為魯鈍加以墮慵孔思周情大固莫窺於聖
域班香宋艷小猶未造於詞林安能繼舊學以承家但

欲誦陳言而干祿豈謂甫紆青綬遽麗丹書念顛頓之
如斯悵功名之安在家同揚子之擔石之儲而晏如貧
甚莊周得斗升之水而活耳敢期推轂力與嗟枯假留
都訓導之官食聖世優閒之俸駕馬力殫於十駕何千
里之敢思鶴鶴自託於深林顧一枝而甚足此益伏遇
某官溫良而剛毅廣博而粹純羽翼聖經起千年之絕
學範模士類振一代之修名徊翔姑挈於荷囊調燮即
叅於槐路以推匹夫納溝中為深恥以哀王孫出胯下
為仁心遂致鮒生亦濡鮒轍某謹當感深知而次骨省
厚幸以捫心鐘响豐山何止効喬潭之賦舟浮渭水更

當陳白傳之辭過此以還未知所措

賀徐漕度除江東啟 三月

伏審菟符垂解龍節遽頒恩流淮服之山川威振江畿
之草木恭惟某官蟬貂雋胄館殿名流詞章為學者之
宗德業繫國人之望卷舒以道中外具宜歛惠牧民安
其田里而無愁恨涉明將漕道之禮樂而有光華矧天
整之要津實浙江之鄰部鵠原在望壯轡交馳謠頌迭
興既揜漢京之八使機衡對掌更觀溫氏之一門某猥
以孤生喜聞新命泮林甫試雖暖席之未遑蔭樾可依
何寒糴之足敷中心自幸尺牘奚殫

謝凌侍郎哲舉改官啟

時以吏部侍郎兼侍講兼權禮部侍郎

風鑿月評方觀引類蠟言拖貌猥許克員窺薦墨以雖
榮玷雌黃而則愧惟聖主勵精之日嚴群工舉士之規
矧居銓部之適聯仍以麟經而入侍賢愚坐別固當存
涇渭於胸中褒貶躬行豈止備陽秋於皮裏凡經提拂
孰不觀瞻必也譽髦何嫌十手之指如其淺俗將致一
軍之驚伏念某業以嬉荒氣非義集守孤陋寡聞之學
乏遊觀廣覽之知偶釋耒於東阡遂抱閤於北闕暖
昧：而自悅涼：踣：以何為披雲霧而覩天方適管
窺之頭搶榆枋而控地俄興風退之災願顛頓之如斯

悵激昂之安在人謀拙矣牧羊乃至於止羊天理昭然
失馬復容於得馬未周再歲來蒞三官瘠餒少寬况免
折腰於五斗支離何用甚慙攘臂於三鍾方官謗之是
虞奚言揚之敢冀適春卿之虛位命碩德以兼官見彈
而鴉灸已求人懷此望待寒而衣裘始索獨愧後時豈
期曲記於孤踪特與加榮於剡奏福固無妄恩知有歸
此蓋伏遇某官蹈德冲和受才英偉魏：墻仞莫窺宮
庭與突之容憂：文鳴如聽韶濩鏗鏘之奏位列中臺
之法從望推當代之宗工為國求賢雖每思於責備待
人以恕終靡廢於兼收謂駸骨之儻來何龍媒之不至

月五日集
卷之七
茅憂謫薄難稱搜揚某敢不温故知新而為師誦詩讀書而尚友既逃吏責亦報已知叛去韓門未應為籍湜之輩游揚季諾庶盛傳梁楚之間過此以還未知所措

謝張留守燾啟

見彈而求鴉炙久深染指之情待寒而索衣裘方有噬臍之悔忽披薦墨猥玷雌黃不待請而得之其為榮也多矣切以小夫賤隸皆有依附先達之心諸公要人誰無汲引後生之意然選調數盈於十百而舉員歲限於二三惟其得之至難是以求者甚力飾偽則栖：而為佞乞憐則覘：而下心賢愚未免於兼收能否或聞於

同滯狂瀾既倒砥柱可回恭惟某官學擅儒宗行為世法靖康初改封章首論於親嫌聖上中興繼駁屢陳於政體觀立朝之節如此則薦士之公可知故每務於得賢庶少裨於報國如某者濫巾泮水斂板暮年既無文采之足觀又乏行能之可取辱知辱愛曾未効於絲毫自銜自媒恥或同於士女方將三沐試劾一鳴然而桃李滿庭液橘何用騅駮乘駕緩奚施足趨起而欲前顏忸怩而遽止豈期風鑿驟賜月評獎之問學之淵源已浮於實許以操修之嚴靜更省其私榮同一字之褒賜重千金之璧水擊而鯤鵬化固未萌萬里之圖月明

而烏鵲飛幸已有一技之託眷存厚矣感激謂何再念
其才雖無他志實有在仕則欲行其義窮則獨善其身
敢思吐茹於剛柔深戒磷緇於堅白區：所守初不作
小有才之謀烟：自期持以為大君子之報過此以往
未知所裁

上徐漕啟

伏聞以賤事貴禮雖盡而情或踈以愚慕賢心既降而
誠則至眷言小獲附餘輝盍陳尊德之言且叙願知之
意恭惟某官材全不器道廣難名學富而得其宗故雖
博極古今而守以約氣剛而集夫義故雖充塞宇宙而

濟以謙馳聲早蓋於諸公踰冠並游於三館握蘭銓部
笑馮唐白首以何為剖竹括蒼顧賈至二毛之奚有貝
錦倏興於萋斐謔波遂至於沸騰結何山杖屨之緣作
茗水龜魚之主彼方殫於人偽此獨任其天真曝輔臣
拜罷之圖時話瀛洲之舊纂列聖設施之要續成迂叟
之書天之未喪斯文道之將興也命雙旌淮甸起膺分
土之榮一節江圻旋試裕民之手簪橐即躋於嚴近縉
紳咸切於依歸矧如瑣：之姿尤劇拳：之志昔也相
望兩地尚思跼足以羸糧今茲仰託二天敢急承師而
問道縱曲木靡堪於應用而良工寧忍於遺材倘於達

卷之黨人許列韓門之弟子則風斯在下雖未圖九萬里之飛若錐之處中或可備二十人之數

謝舉狀啟

鑽仰期年未有求知之道題評數語驟為行己之光緇衣之好雖濃華袞之褒豈稱伏念某修名未立雅志多違學昧本原力勤而功甚寡道迷涯涘齒壯而氣則衰念家惟詩禮之傳且世負廉平之操一官拓落十載棲遲如彼駑駘敢與驂騑而爭驚譬之鳧雁但違矰繳以求全故雖值於聖時每自安於選調知者憐其守常而有取媚者謂其抱拙而可欺蓋嘗坐困於樊蠅尋亦來

歸於塞馬竭領半環之水獲趨數仞之墻官盛則諛斯言何恤仕優而學此願倘從顧慚下愚不移之姿初乏孺子可教之質不圖眷獎特與薦聞善事上官既靡失於名譽無以下體又曲采於菲葑自非汲於群材誰復拳於孤進茲益伏遇某官任隆先覺望重中朝足國裕民特其餘事推賢揚善是乃本心惟待士以恕而取之至公故錄人之長而畧其所短豈特周爰咨諏副皇華之遺固將雜進巧拙敦宰相之方遂容無用之才並綴兼收之列某敢不勉為遠器圖報厚恩叛去韓門未應同籍混之輩游揚季諾庶盛傳梁楚之間

回句容范宰自啟

詔黃疏寵綬墨臨民邑有賢君士無異論恭惟某官名
高雋軌知達通方君子學道則愛人是為素蘊縣令承
流而宣化聊試長材矧句曲之奧區寔仙壇之鄰壤里
閭不隔風俗無殊民既熟於聲猷公亦知其利病諒靡
勞於施設可坐致於歌謠雉化中年方觀異政鳧飛葉
縣即踐中臺某久慕風期幸依雲庇曩緣隨牒莫爭快
覩之先連辱貽書復愧往酬之後其為感悚莫究名言
賀王德言除同知樞密院事啟

伏審進由內相登貳西樞金炬夜歸未斷玉堂之清夢
朱衣對引已推崇政之新班簪紳豔稽古之榮旒冕倚
借籌之畧恭惟某官真才帝賚厚德天成道傳孔伋之
中庸氣養孟軻之剛大立言有法視荀况揚雄為未醇
致主無私豈管仲晏子可復許久積鈞衡之望偏儀禁
省之聯賢貴名愈白於一時眾論悉期於大用當戢干戈
而求懿德遂暮帷幄而耀台階政本有歸茲萌盡折三
軍五兵德之末也非以煩公一日萬幾人其代之是資
佐聖某名居魯泮實在鄭鄉初聞制詔之誕頌頓覺江
山之改觀以蠡測海豈復為下愚非處士之辭如鴻遇
風但欲作聖主得賢臣之頌春陽駘蕩機務優游願調

鼎食之和下慰民瞻之望其為依向實倍等夷

省齋文稿卷第二十一

省齋文稿卷第二十二

周益文忠公集二十二

啟二

回新同官黃從事石啟

紹興二十九年三月

伏審欽承丹詔來總青衿惟才華舉世以推高宜士類
 望風而歸重恭以某官識明慮遠學廣聞多北闕上書
 早結知於真主春官擢第並傳道於雄藩亦嘗分教於
 宗英乃復存司於侯類類甫聽鴉音之革即觀鱣服之頌
 某父復同僚忽勤執訊瑕丘甚拙正資董相之通經至
 德何能更賴劉公之解事其為心悅詎可文陳

回漂水唐宰錫啟

四月

伏審九重出命百里得賢錦素製而才優琴甫鳴而化
洽伏以某官懿行孚于鄉黨高文播于搢紳將觀展驥
之能先試割雞之手昔孔門高弟多由出宰以成名暨
漢氏諸賢或用徒勞而興歎蓋古以社稷民人為重而
此惟簿書期會之趨自非慈惠之師孰識後先之序三
岑未遠四長何慙某久矣聞風茲為托庇豈謂蜚鴻之
信亦羅雀之門感幸則多喻言徒費

賀李大夫植自湖北漕移江東啟

伏審上節湖陰改轅江表事愈繁則才愈見地彌近則
眷彌深成命初頒先聲已振恭惟某官道隆德盛學富

文雄杖策而謁軍門早効房喬之智受釐而坐宣室倏
興賈誼之思帝階甫遂於對揚天語屢形於歎獎剖符
以去雖進取之甚廉乘傳而行知褒遷之未艾曾靡淹
於歲月果移按於封畿惟此外臺號為要路竊詳稽於
近世皆入選於邇聯矧明公望實之已孚而聖主簡知
之有素紫樞黃閣蓋方虛位以待焉赤輓斑輪是亦假
途而進耳某萍飄孤迹匏繫微官將庇賴於卿雲稍激
昂於懦氣莫陪縣令為漢使之先驅當與諸生俟何公
之行部其為欣頌罔罄名言

謝江東吳漕舉改官狀

兼提舉學士七月

志在求賢方切緇衣之好名非出衆首膺華袞之褒心
感激而固深顏忸怩而亦厚竊以公論明於上先王存
歲貢之規私義行於家後世著月評之目明於上則可
助朝廷之治行於家則但為鄉黨之光此人材滯滯之
攸分實王政廢興之所係於皇昭代有掩前聞分道置
臺豈特轉輸於饋運乘軺按部是將甄別於賢愚矧載
郁於文風尤申嚴於學政維時十郡不越三章游大人
以成名時方競進占小善以率錄舉則誰先雍齒封焉
漢軍驚矣伏念某生而極陋少也多屯道未見而迷方
學弗成而筮仕言游芹水密庇卿雲搯行不足以率人

詞章不足以名世懶書畫寐幾為弟子之嘲騎馬醉歸
常畏廣文之罵空糜寸祿實愧初心誓將斲：以窮年
恥復栖：而為佞固非韞匱有美之玉庶免躍冶不祥
之金不汝瑕疵已為厚幸在公鑪錘斯亦何名此益伏
遇某官粹德尊朝英詞冠古獻納將歸於適綴澄清荐
試於近畿文紀理輪外振使乎之職鄭莊推轂內推長
者之心茅慚賈誼之才不稱河南之薦載念其趨風雖
晚託契則深先父聯名已列年家之子南宮試藝又為
門下之生茲居巡管之中復在推揚之數恩榮參會駕
純增光知我者春秋初靡緣於介紹報之以瓊玖請申

誦於詩章

賀金陵韓帥啟

伏審輟臨北固來尹東郊厥德允修膺畢命保釐之托
惟民其人賴君陳分正之功溫詔風馳輿情草偃恭惟
某官學皆自得道本躬行粲若詞章妙合璧聯珠之句
凜然風采挺渾金璞玉之姿惟聲猷居衆雋之先故眷
簡絕諸臣之右所臨官大厥問日彰鳴玉甘泉首冠荷
橐論思之列奉瑄泰時獨膺栢梁賡載之歌至於振淹
滯於三銓究源流於萬貨投之盤錯鋒鈍益礪而莫撓
試以妍媸冰鑑愈明而畢照內鎮神皋之壤外綏南海

之區開閣勸民延壽化行於馮翊投文逐鰲退之威著
於炎陬方將入贊於事樞乃屈荐臨於藩翰蓋大用必
資乎詳試而重權莫越乎居留非信而謹者不足以付
管鑰之權非剛而明者不足以任兵民之寄宜聖上疇
咨而弄印惟我公僉屬以分麾十乘鼎來雖慰江東之
父老三槐夾輔已虛朝右之班聯豈待政成即聞王覲
某才非秀穎迹因飄流念昔備於屬僚幸獨蒙於眷顧
茲塵泮水復在下風以五經而授諸生有愧東都之文
學作三篇而選童子願歌西蜀之中和欣擇居多名言
莫盡

賀湯左相啟 十月

伏審明制揚廷首台正位暨湯咸有一德又合天心惟
說命總百官益符帝賚燮調雖舊體貌加新竊以奮庸
固賴於臣鄰注意莫先於元輔如群材之參大厦獨倚
棟隆若列宿之拱北辰孰踰魁望故舜重九官之冠而
周殊太宰之名豈徒流纘之仰成抑亦簪紳之絕擬於
皇上聖懋啟中興仰惟前代而迪厥官方慎冢司之選
爰立作相而置諸左必歸間世之英恭惟某官道貫誠
明運逢開泰早據康濟之學親結聖神之知獻納禁途
備賢人之德業周旋政路茂君子之經綸曩自籌帷延

登宰席雖玄功密運如陰陽造化以難窺然嘉績外彰
有歲月事為之可紀上則五行之布叙下焉百穀之用
成鎮撫蠻夷而疆場自安招延豪俊而滯淹咸振賞刑
並設勸懲各當於罪功職業交修總覈莫逃於名實至
於獎耆英而敦風俗薄賦歛以厚生靈成規恪守於祖
宗浮費力裁於中外相大廷之禮需章預避於褒遷奏
實錄之篇謙德反推於筆削悉哀衆美度越前人宜萬
乘之深知非群工之敢望謂僕射百僚之首無官可酬
惟春秋一字之褒虛左以待僉言久屬渙號用敷就陞
上相之班永贊太寧之化文武之道識其大者方將暨

唐於蒼姬蕭曹之勛不足進焉夫豈區區於炎漢某嘗
叨恩顧逖阻師瞻茲拭目於黃麻彌傾心於赤鳥壽域
開而鴻鈞轉重歌韋賢拜相之詩祥風翔而和氣游願
上宣帝得臣之頌其為欣抃實倍等夷

賀孟宗丞除江東運判啟

伏審璽書中出金節外移千里長淮甫離舊治六朝故
國已及新疆光華增煥於一時賓餞交馳於兩境恭惟
某官道該儒行學詣聖真少日懷鉛預纂兩朝之信史
盛年結綬入修三格之新編隨從鷄翹遽辭龍尾以典
郡則著循良之効以察州則飛廉按之聲駟駱載驅宣

勞惟舊豺狼當路悉力以除既仁者之勇聞宜使乎之
責塞近畿劇部少酬久次之庸禁路清班即奉適歸之
詔某讀書甚晚從仕數竒竊伏海濱聞公子者舊矣久
逃空谷聽足音而楚然况以微官烏依厚庇曳裾有路
固當輕萬戶之封拆襪無長恐未免衆人之遇其為欣
悚交集襟襟

謝提點李直閣植薦舉啟

十二月

環九路以掄才豈無竒士紆數言而削牘乃及腐儒衆
以為榮心焉有愧竊以知人之法自昔所難引類之方
於今尤弊羊質虎皮之莫辨駑才驥足之並馳游揚多

藉於先容囑託更資於奧援乃以有限之數而應無窮
之需三沐三薰求之固未易矣一與一否舉者亦惟艱
哉必將少振於頽風莫若力持於公論我心匪鑿詎可
形逃仁者樂山豈容力拔惟知此道違恤其他恭惟某
官望重儒林勲高霸府飾躬以有用之學應務以不群
之材自賦命以登車每盡誠而推轂未處棘槐之位先
成莠李之陰孰謂膺門亦容噲伍伏念某志徒好古材
不逮人小智自私絕望紆朱之樂大方見笑甘心尚白
之嘲一蒞芹宮再徂芳歲菊荒舊徑時夢於刀頭刀發
新硎實慙於錐末比緣天幸獲庇霜臺區區數月之間

財能免咎役之衆人之後安所取知忽形論薦之言莫
測黃緣之自雖品題斯誤三復多慙然授受之公兩皆
無歎某敢不深思國士之報少答古人之風同薄命於
史談敢嘆周南之滯遇賞音於伯樂能令冀北之空

賀王同知除知院啟

紹興三十年正月七日

伏審廟筭成功

帷幄決勝千里運籌專倚於

子房文武為憲萬邦受祉孰先於吉甫雖不移於兵本
實增峻於民瞻竊以象著西垣將相對分於四輔色齊
北斗魁樞首冠於七星於赫聖朝仰稽乾度盡以韜鈴
之柄總於宥密之司昔嘗兼掌於相臣今乃獨釐於院

事求懿德而肆時夏方永保於橐弓惟吉士而相我家
茲共圖於立政恭惟某官潛心聖學冠德民彝孟軻之
傳得其宗伊尹之覺以此道綢繆異眷翔翥要津自參
華於豹尾之中即稟務於鴻樞之上助宣七德坐閱累
年借箸於前有謀猷而必告積薪於後無喜愠之可窺
建疇久次之庸始正通知之拜屬聖上擇人而絕幕繫
忠誠憂國以忘家抗疏請行漢廷臣無出右者奉書歸
報古虜使其猶劣諸將完揆於元台始升班於右府使
國人皆有所式豈惟中外之聳觀示天下弗復用兵益
亦華戎之永賴某受恩殊厚聞命祇歡方局促於芹宮
阻進趨於材館高山仰止幸再逢巖石之新一葦航之
毋使歎瀛洲之遠其為欣懌實倍等夷

回溧陽蔣宰賀年啓

杓攜龍角日會諏訾惟時慈惠之師宜介靖共之福恭
惟某官一司任重三異政殊宣布寬書俾民編之交泰
蠲除宿弊隨歲律以鼎新道既方亨慶將焉往某居然
在泮邈矣登門擣藻甚華想夢謝池之草尋芳伊邇遙
瞻潘縣之花善頌攸深文陳曷喻

賀邢倅孝肅啟

詔檢中頒屏星夙駕贊管鑰居留之尹屈蓬瀛寓直之

僊望實所加旒倪交慶恭惟某官英規玉立麗藻瓊敷
長鈇短檠事業並風騷之將朱輪華轂功名非恩澤之
侯方時左戚而右賢力華外輕而內重故資雋望詳試
民庸蕩漾秦淮聊復問津於半刺岩堯魏闕即陪奉引
於拾遺某積歲傾風指期托庇願與紛々之振鷺共親
疊々之談犀欣頌交深喻言曷既

賀蘇倅啟

陪京地重別駕官尊任既得賢人斯交慶恭惟某官熙
陵勲臣之裔元祐儒相之孫慷慨功名固嘗自許淵源
學問寧愧家傳以茲人物之英宜在羽儀之列云胡外

補猶滯右遷益惟魏國之賢早著江寧之政故迂泥軾
來訪甘棠海沂之賴王祥少資佐理宣室之思賈誼即
聽遙歸某才不如人仕惟竊粟念傾風之甚久喜披霧
之在茲豈特區々仰藉旃幪之庇亦將纚々歛聞議論
之餘欣幸居多指陳曷喻

謝金陵帥韓尚書啟

二月一日

剛嚴少許人爭異於混竒薦舉有名恩首加於紆等欽
惟公選實激懦表竊嘗屈指於先賢孰不垂情於後進
然汗簡編摩之可考惟華宗獎掖之為多舉壺遂而進
臧君世稱安國薦崔生而引嚴武時重朝宗或知鄧暉

而諉以子孫或識西平而遺之器帶既奕葉素高於風
鑒宜真才復振於家聲倘非蹇仕路之英寧許上公車
之贖如其年者直非諤：訥甚期：居貧微指廩之交處
眾乏容卿之量訪書臺於東觀勇愧除蛟回俗駕於北
山心慙怨鶴竭遊泮水坐閱再期無五經之縱橫可為
模範有二穉之簡忽徒致謗憎職以曠聞分宜罪免竊
幸荊州之識俯憐絳勃之庸爰自下車即形慰藉逮茲
推轂更誤品題永言待遇之殊初匪黃緣之助此蓋伏
遇某官功高三傑文倡諸儒曳履中臺獨厚龍淵之賜
擁麾南海載揚鰲水之威聖神嘉鯁峭之資內外著虔

共之譽吾用休而安社稷將踐政塗王錫侯而架旂章
荐臨藩服每憐：於庠序尤汲：於俊髦何取迂愚乃
加褒拂益以鄉閭之非遠且於姓氏而可推東魯大邦
嘗許鄭田之假弓高貴族未忘周烈之餘用書千載之
盟加賁一言之褒某敢不紳書厚德鞭策凡才聘賢士
以廣謀既辱長公之薦召陋容而說禮終酬祭酒之知
賀洪景嚴除內相兼吏書啟

伏審進儀內相仍長中臺夕對金蓮結絲綯而承聖問
晨趨玉笋曳華履而領從官自非兼孔氏之四科安得
被賀公之兩命竊以翰林近華蓋素號恭嚴文昌映紫

薇是司喉舌自昔法天而分職於今弄印以掄才繫國
名儒應時遴選既兼官之俱稱宜上象之交輝恭以某
官學富家傳材優天授徧觀流畧豈徒窮九立八索之
淵源洞察幾微固已熟六狄五戎之利害早振平臺之
響即符宣室之思譽滿朝端譬之鳳凰芝草以為美瑞
才周世用非儒生文士止有偏長三入脩門九遷華貫
帝王之制坦然明白寢揚聞於西垣道德之威成子安
強亦宣勞於右府式疇久次宜畀殊遷自丞郎而入北
門考院規而無僂由佐貳而陞太宰即選部以有光一
時傳陸贄之詔書多士賴山公之啟事矧如先正久暴
大忠半世龍庭猶握尚書之節浹旬鰲禁莫真學士之
除幸天定者亦能勝人故善積者必有餘慶是開賢胄
來踐世官繼處內廷踵贊皇之盛事並經常伯掩謝氏
之前聞行由供奉之班立筵凝丞之列某雖登門之日
晚辱解榻之意濃賫伐求官方愧旅進於馬牛之走泥
姦伸滯遽回便文於雁鶩之行曾未叙於感悚會來陪
於賀客道古今而譽盛德非以為諛衷章服而揖上官
是云藉手永言欣感難罄敷陳

賀都總領索啟

伏審分職地官峙糧天塹九霄觀象使星郎宿之交輝

十道披圖江表淮壖之並總選除甚重倚信可知恭惟
某官學粹而才雄色和而氣勁棲遲遠郡如鳴鶴之處
陰凌厲周行若飛鴻之漸陸屬嚴助厭承明之直顧壽
昌高平糴之才爰輟小銓往臨近甸授田中率既首應
於褒書攷績及期更誕頌於寵命內幹左曹之賦外司
土壘之儲錦帳過都諒膺晝接繡衣誇里寧歎夜行方
將宣渦口之威何止實閩中之粟其熟誼聲於士論聆
政術於官塗惟今臺治之所臨實許校官之先睹王人
在諸侯之上行規多儀談士輕萬戶之封幸符夙志其
為闔憚未易敷云

謝徐學官啟

四月

二年在泮席既煖而安焉一命登畿壇雖寒而寵矣亟
別驚猿於北壠來窺振鷺於東練遷不以功望非其素
惟今昔恢崇於學校益國家教養於賢能並置明師既
先之以道藝旁分衆職又輔之以規繩或汲：於作新
或收：於掌故將欲德成而行立茲庸事制而曲防不
有儒先孰膺官使如某者立身多難賦性下愚知修能
矯節之可為顧蹇步薄材之難強文史近乎卜祝况未
足於三冬詞賦賢於倡優偶見收於一第倚斷：而無
技常兀：以窮年昨誤甄陶外司黷舍身免折腰於五

斗恩容攘臂於三鍾青出於藍居有後生之畏玄母尚
白屨為弟子之嘲坐閱歲華行終期成分甘乍鷄翔數
仞之蓬蒿望絕翠蚪擻九閩之膠葛屬伯樂方空於冀
北憐史談獨滯於周南俾綴英遊遂頒號召觀道德於
前後幸陪多士之間計班資之崇庠敢謂伯寮之詆幸
之至此誰則使然茲蓋伏遇某官格帝勛高求賢志切
已底亨嘉之盛益躬吐握之勤厥亦惟我周王方賴以
寧之多士時則有若伊尹每懷不獲之一夫故賤微弗
忍於遺止而巧拙或容於雜進某敢不仰銜化育俯策
惰媮助國四維固有慙於躬率奉規五等當毋廢於司

存惟曠職之可逃諒酬知其未晚

謝循文林郎啓

六月

繫官於朝誦儒規而未熟積日閱月因選調而稍遷功
歸鑪錘之間感溢瓶甕之外某聞大言則望大利賢者
所以事君小才不離小官眾人所以繫日故傑士必登
於要路而庸流皆踵於常途惟其兩適於器能是以各
安於分義伏念某地寒身賤才薄志卑學昧淵源如斷
港絕潢而為用文無根抵惟分章摘句以自娛入仕十
年蒞官三考稟資罷軟既不能陳力以赴功受性昏蒙
又不可彊心而為智以茲斂板何所取材聖圖廣大之

秋賢相招延之際逢辰如此忍自投於寂寞之濱摩鈍以須終不越於拘攣之表誰謂化工之和氣力回冰谷之寒葦已容列屬於學宮更許陞資於銓部依流平進固小道之當然較短量長舍大鈞而奚自此蓋伏遇某官儀刑姬旦左右周成如碩膚之公孫而無狼跋之虞贊太平之君子而享鳧翳之治上則賞誅有序柄用八以詔王下焉廢置何心歲歷三而計吏雖名一藝猶玷七階某敢不念寸進之難戴曲成之造無堪而等聳贖愧莫効於犬雞畢命而守階墀願常陪於鸞鳳過此以往未知所裁

上宰執啟

八月

某生而孤露長困飢寒間於鋤耰勉事鉛槧稟資既鈍用志復分徒竭謏聞迄微片善嘗欲擁醫門之篋挹瀛海之波庶幾鍼砭膏肓霑濡枯槁顧以人微而迹遠居然志切而願違豈謂相公矜推魯之無能念依歸之有素驟從外服收置中都已數許其望塵更喻令其投贄歸而三省逮此四旬與其逡巡而干鈇鉞之誅孰若緝而取範模之正用袞毳毼上瀆顛融先索甚榮雖辱知於相國陳篇是獻懼見斥於宰臣加以楷注盈編重輕失序曾無一可稱之語難道五不諱之愆屬近遂於

巖瞻重再干於賓贊輒憑尺牘粗述寸誠干冒鈞嚴不任震懼

謝除館職啟 九月

從國子先生之後六見月書造集賢小職之間再承天詔未厭璧池之浴德已容玉海之觀珍茲惟造化之功深夫豈凡庸之夢到竊以置圖書之府歷代所同號英雋之躔明時尤重益彼徒誇於典籍而此兼貯於人材雖預晏賦詩待遇幾同於兩禁而進階廢職愛憎或出於一時由居官不責其有為故流俗竊疑其無用豈知封植拱把者所以備明堂之棟寶藏璫璣者所以成清

廟之彞但觀累朝傑出之資可見三館養成之效欽惟上聖懋啟中興臺計十金未嘗奢飾府模群玉乃獨鼎新隆樓傑宇之千霄隱帙典篇之棟架上追淳化大書開秘閣之碑密契皇唐南向對憲臺之戶譽髦斯士宏達為群必翰林墨客之俊才識竹簡漆書之奇字馬書五尾能辨其非亥有六身默通其數乃宜當於清望且不愧於素餐如其者少日百罹長年一第悲粟鍾之弗泊固當屏跡於民廛悵菊徑之就荒乃復萌心於仕籍試吏未更於州縣入官輒近於都畿何有聲稱副諸大夫之深獎居然號召綴百執事之下陳雖農馬之智專

曾犬雞之効之所憂被譴反辱見貽矧臺家復古之秋
 正館殿員直之日必使上北門之對乃令窺東壁之光
 甫下新書封武都之泥紫遽尋舊習忙舉子之槐黃裏表
 章服以宵興抱檠鉛而晨入餐錢供張固無露索之持
 洵思蕪詞幾有倒紉之笑粗彈薄技僅列奏篇凝旒心
 恕其空踈當路面稱其拙直河東賦就吹噓力致於上
 天溟北風高決起遂逃於控地以凡骨而預飛騰之數
 以寡聞而聯是正之曹僥倖既多忸怩亦甚昔劉晏能
 訊於朋比而耀卿善屬於文詞皆以竒童振茲清職慨
 漸哀於蓬鬢難遠繼於芳風茲益伏遇僕射相公鑪冶

鑄頑雲雷濟物奉行故事方將糠粃於弱翁刊落陳言
 每欲網羅於韓愈善類願忠而望賜誠心校短以量長
 何取謗涼使參俊又隔弱水者三萬里示以津涯登瀛
 洲者十八人進其步武正唯蹇訥莫叙感藏某敢不稍
 究六書因推九寫願李邕之一見肯務近功友孔子之
 多聞安希遠器或因涵養之力粗報生成之恩

汪侍御頌德

某官節勁而氣和才全而德稱執憲浸更於三院注懷
 方厚於九重以崇論宏議砥柱頽波以大冊高文主盟
 吾道眷言孤跡猥冒殊知深嘉屢嘆於詞場較藝之中

右挈左提於學省効官之際隔弱水者三萬里示以津
涯登瀛洲者十八人進其步武正唯蹇訥莫叙感藏

洪內翰頌德

某官代襲儒宗望隆邦哲泰山北斗異時天下之三洪
常伯名即此日臺中之二妙久徊翔於禁路行勵翼於
政塗爰擣甚古之雄文式訪當今之急務隔弱水者三
萬里示以津涯登瀛洲者十八人進其步武遂逃飲墨
來覩汗青

楊內翰頌德

某官間世鴻儒奕邦壽俊草玄奏頌真今日之淵雲裁

詔司戎號內廷之顏收久持從橐行秉政機垂紳窈窕
之禁扉注目盤珊之窘步隔弱水者三萬里示以津涯
登瀛洲者十八人進其步武遂逃飲墨來覩汗青某敢
不稍究六書因推九寫念張籍學書之替永感增懷懲
崔氏美庄之荒終身圖報

試館職謝洪內翰楊內翰小啟 九月

某性資甚鈍學術浸荒比叨號召以試言方懼報聞而
貽誦徘徊既久冒昧以前誰意薰蕕曲憐叢品厚於為
禮恕以命題深知潢潦之無根靡責淵源之有考迄緣
假借僅獻狂愚點化工深乞西山之靈藥扶搖勢便度

弱水之迷津人或謂其至榮心敢忘於所自屬齋詞之
未竟加謁制之重踰布武莫遑臨文知愧徐輯荒唐之
語別陳感謝之私尚望高明俯垂矜察冒瀆嚴聽伏須
重誅

答徽州巫推官啓

列屬西庠甫接諸儒之武分光東壁遽披四部之文所
慙非騎氣之姿何自綴驂鸞之數忽辱騰緘之貺乃知
推轂之由此葢伏遇某官質俊而氣和名高而實副稟
秀仙茅之壤素挺竒材泛蓮道院之邦益昌遠業方屬
急賢之旦即頒迅召之書俯眷疲庸嘗承緒論借以揄
揚之助進諸英雋之纏未能一通嘯之言少伸謝臆
顧乃三復翩之記增激感悰惟誓珍藏以為永好

謝戶部張侍郎舉自代啓

書林退縮苟安無似之蹤禁路推先猥上不如之奏葢
高誼曲敦於先契念孤生難繼於後塵遂以名聞駭於
衆聽竊以九官相遜始自虞廷三日舉知盛於唐世然
必事業功名之相亞與夫輩流位序之非遙故當受職
之初可致讓能之義乃如今日久異前聞明公以絕識
瓌材而其性資甚下明公以老成宿望而其爵齒微卑
竊伏三思殆無一可特以諸父瞻承之舊畀之片言獎

借之榮雖上臣事君以人不暇賢愚之間然他日居吾
此位實慚期待之優此蓋伏遇某官厚德端朝精心照
理粒民敷教方將兼稷契之功富國強兵寧復用管商
之策行繇卿貳交秉政機欲助承歸厚之風故垂眷甚
涼之品廣陽秋於皮裏所憂仰累乎否臧薦伏獵於省
中更恐誤知其學術某敢不銘藏至意鞭策凡才未四
十而為丞即決無此望從三千而為弟子勉在下風

賀汪參政啓

伏承竣事行營奮庸近弼徐方不回而歸休父酬暮年
節制之功衮職有闕而補樊侯贊萬世保衡之業宸心

所屬民譽則同恭惟某官惠和忠肅而極之以誠敏達
清明而篤之以學望其風采凜名世之巨材發以詞章
驚前人之逸駕惟是規恢之大固宜進用之難天方佑
於我家帝親知其國士拔之冊府付以憲臺凡上前獻
替之嘉謨皆天下安危之至計遠文王有獫狝之難正
切焦勞顧李愬帥鄧隨之兵尚虛統督一言辰告千里
暑行雖逆順不同虜有當亡之理然強羸相絕我無必
勝之資况驅剝襄不教之民中控吳蜀相望之勢衆方
烏合虜則鳩張甲戰而乙乃還北攻而東已急指麾諸
將激勵群豪赤幟二千亟歸於韓信精兵三萬幾獲於

左賢群胡由是以大奔故地乘時而漸復人惟求舊既望實之久乎賞不踰時亦勲庸之當報茲惟古誼抑有成撫盜滅甘陵彥博入登於宰席使來西夏仲淹歸贊樞庭不圖仁祖之前聞乃至紹興而復見某辱知甚厚在治有初上馬從軍揣已昔慚於不武懷鉛抱槧期公力致於不平欣頌之懷編摩莫盡

省齋文稿卷第二十二 終

省齋文藁卷第二十三

周益文忠公集二十三

啓三

謝改官啓 紹興三十一年五月

黃本讐書已濫巾於秘府赤墀拜秩更寓直於祿審官省功狀以茂如承命書而愧甚竊以陞遷之典莫謹於聖朝考覈之規具存於文部自仁祖肇增於薦牘而元豐大正於官名法既一成時無他覲惟入服王畿之采乃獨殊選調之人既不假於薦揚復稍裁其考任以此待英髦之士誰曰不然如其容蒐瑣之流斯為過矣伏念某掖衣自奮襪線何施欲扞塞乘邊初之蹶張之勇將

月益公集 卷之三
圖功慮事顧微心計之優甘為盛世之腐儒勉蹈古人
之陳跡岩堯雁塔昔聯千佛之名竄寃麟臺今接群仙
之武猗無薄技祇有厚顏鷄躍蓬蒿竊自安其小大鳧
飛渤澥迄何係於少多茲參滿歲之文越進在京之秩
雖云極陋敢昧攸歸此益伏遇僕射相公該輔簡乎帝
心奮庸孚乎人望有伊尹之一德上格皇天 成周之
大寧旁求多士肆容平進例獲次升某敢不仰服官榮
俯安職守念無功之可錄幸一進階誦有德之必疇願
三致志過此以往未知所裁

史院上提舉僕射相公啟

共承某官以經國之謀贊視師之舉君臣協德靡辭
薄之勞夷夏歸心佇獲廓清之應某自惟庸懦辱在屬
僚仰睇篆車莫備揚之御暫違赤舄徒勞赫之瞻
方屬初寒敢忘善頌願厚鼎茵之輔益綏福履之和

史院上提舉僕射相公啟

紹興三十二年

驟違英袞俄易芳年自惟托迹於甄陶寧不傾心於夙
夜今者杓携龍角日會諏訾當國家正朔遠布之時實
輔相年德加新之際中外舉勤於善頌神明必介於殊
詳某既未容陪賓客之後塵又不敢修慶賀之常禮姑
因尺牘粗述寸誠和氣熙春賴宗工之鈞播東風應律

周益公集 卷之五 知殘虜之冰消迎拜尚遙坐馳更切冀慎鼎茵之節式符夷夏之瞻

除察官回福州王尚書

讐四部之書久迷魚魯糾六曹之務驟玷龍光揆庸懦以無堪殆黃緣之有自此蓋伏遇某官望隆壽俊世號儒宗鎮撫藩方屢紀循良之績論思禁路居多仁義之言既班聯居近侍之先且闕闕在諸公之上茲逢新政乃眷舊人竚秉執於事樞以輯寧於夷夏某追惟先父嘗附巍科未容布武於前榮何敢通名於執訊不圖謙德遠賜柔函選擢於公朝已踰其分勤褒稱於耆德

益重厥愆端：在中云：奚盡

回新邵州李守元老忠啟

分安冊府都忘歲月之遷思徒憲臺大懼寵靈之過衆方譏笑公則吹噓載窺春藻之華更切夏畦之病恭惟某官兩朝大丞相之子今日南諸侯之良發以儒猷知傳家之有自施諸政術喜繼美之無忘去思甫切於清湘因任再勤於鄰壤兩邦父老雖渴見於朱輪九陸班聯竚歸持於紫索某自惟晚輩尚識諸昆慕巨室之多賢矧叨契好歸靈光之獨在彌想儀刑方期家國之榮宜適鼎茵之節乃如悃悃未易指陳

回吉州張判官啓

披風未遂蓋或有時注記不先豈為無罪敢謂謙冲之
至遠勤翰墨之臨使知託契之所從加以噓枯之過厚
開緘三復省已多慙恭惟某官義概根心儒猷飾吏仕
將行志顧何擇於崇早才遇可為初不論於劇易參釐
群政藹著氓謠少須歲月之間即步雲霄之上某遐瞻
幕府阻預英遊揚善推賢雖抱憊之意挾山超海茅
憂憂之難愧仰兼懷喻言莫盡

答平江沈侍郎介啟

內出左符起臨右輔吏民朝見條教夕聞恭惟某官脩
九德以持躬堅寸心而許國脩門三入進以正而甚崇
諫匭萬言去未幾而輒驗茲逢新政乃眷舊人親盼一
札之書首置諸侯之選誅狐狸於七日士知繩墨之難
踰汰雁鷺者百曹民喜銘筭之坐絕袞方待補公盍來
歸其久遠實崇常依德宇長筭例拜驚看春藻之華盛
禮逆施愧甚夏畦之病其為感激豈易敷云

答葉伯益起啟

二年抱槩無補公家六察聯華更慙僉論推本叨踰之
自深知假借之私此蓋伏遇某官學擅儒宗望隆邦雋
聲猷日茂親承太上之知議論風生高出群公之右又

秉屢書之筆行真三字之除胡為厭承明之廬顧乃在
諸侯之選載疇治最雖旋膺臨遣之榮仰揆宸衷恐即
有召歸之寵遂由禁路進貳政途某迹遠門墻心懷德
誼曾尺書之未達已華翰之先臨愧荷交深編摹莫盡

除左史答湖守陳阜卿啟

分察南臺初無一善參華左掖豈有三長塵上命以欽
承酌輿言而內愧此蓋伏遇某官望隆邦哲才號吏師
措紳之所範模流宸之所簡注河潤九里可令枯朽之
含滋袞袞一言坐使駑駘之增價遂容佔俾猥預書言
尺牘未馳正以京塵之汨沒長牋見及足知郡政之優

游感激在中敷云莫盡

答洪總領適啟

裏行身列拆襪線以無庸侍立螭頭結綯絲而有愧靜
言所自推本乃知此蓋伏遇某官哲以爽邦德惟輔世
并包衆善非偏文士之長恢廓宏圖可大賢人之業眷
惟三傑實萃一門叔仲飛騰已迭居於載筆聖神纂紹
宜首趣於觀圭屬遘微之尚驚顧軍儲之尤重與其屈
張蒼而為柱下之史孰若煩蕭相而餉閨中之師致此
妄庸暫茲承攝未展事賢之禮俄披執訊之書讀英辭
於方冊之間師承惟舊藏尺牘於巾箱之內榮幸則深

其在感悰曷勝言喻

回江東葉憲謙亨啟

伏審親簡睿知進聯禁直下璽書於劇部固知使指之增華記閣老於西臺猶恨寵章之未盡顧私心之所喜以公道之浸開竊惟士大夫不吐剛鮮聞近日部使者不案吏蓋亦成風上方力變於情媮公則首膺於褒擢共惟某官學貫六籍文成一家以言語侍從之流任原隰馳驅之寄三尺從事何彊禦之足云六條察州聞姦賊而輒舉當宁深嘉其諒直滿朝爭誦於澄清望貽謨之門茲焉通籍直玉堂之殿行矣擣文某阻濶茵憑瞻依蕩輔向由尺牘畧寓於歡悰逮辱長牋殊深於感臆其如悃幅豈易敷陳

回洪帥鄧直閣拈啟

祇奉詔除存膺閫制任一道兵民之責寬九重宵旰之憂共惟某官重厚而疏明端方而樂易學皆有用不為泥古之空言政本無私每著裕民之實効屢奏藩方之最進參藏室之華令修庭戶之間流風可考身在江湖之上雅志難忘即歸踐於禁途以茂摠於賢蘊某方圖展慶先辱擣詞仰謙德之勤渠激懦衷而悅懌

奉祠歸廬陵答吉水羅朝請渠恭啟

隆興元年

月旦評高服膺久矣風舟山遠極目悵然茲置散以來
歸幸親仁之浸邇恭惟某官以旁搜遠紹之學濟中坦
外莊之資冠映儒林最為先達周旋仕路亦號老成夫
何進取之廉猶緩凝嚴之直朝多虛位公可騰裝某弛
擔云初達函未果隔千里而共明月方期適兩間人之
心烹雙魚而有素書乃首勤十從事之既其為感愧未
易敷云

答安福路宰植啓

族大而才流聞惟舊政優而近渴見益深顧方從山鹿
之游未暇往雲鴻之記荷高情之異甚屈妙語以先之
恭惟某官躬受雋明世傳清白凡人所難而我獨易蓋
才力之無窮其譽滋著而位未克特主知之有待政已
成於雷土寵即荷於天衢某竦聽合符首期傾蓋適屬
三秋之杪尚調六氣之和

賀湯榮公赴召啓

召還袞舄對掌鈞樞升之賜位之尊昨以諸公之貴雖
王曾再入姑循景祐之舊章而曹相定封實處鄴侯之
前列制書一下歡頌四馳某聞時不易然乃鎡基之當
守歲如晚矣何觥飲之能須若置棋自有後先而芸草
必瞻內外一失其序孰成厥功憶敗止之虜將歸方戰

守之機未決獨公抗疏於居留之際謂國失誤於閒暇之時曲突徙薪當日無聞於思澤震風凌雨後來知託於幘幪共惟某官絕識鄰幾孤忠拔萃出緒餘而應務人莫能名竭悃幅以事君天其知我蚤恢隆於相業又慰愜於民瞻事有從違時存用舍挺然勁節自不改於雪霜曾是浮雲果何傷於日月逮茲委重初不辭難言念比年適逢多故技非越人不足以治衆疾力非烏獲不足以勝千鈞然而廷議靡同敵情叵測師已疲而解嚴尚遠民既困而趣辦方興明良都愈固屬一堂之默運疏附奔走亦資百職之贊成顧堯者每嘆難全而

碌者豈能成事封大夫於即墨毀已日聞補衮職於仲山愛而誰助正資碩望力制頽風照之以著龜之明何邦巫之能惑鎮之以山嶽之重俾國勢之漸尊庶幾期年馴致大治微管仲其左衽矣豈徒銷猾夏之憂用仲尼為東周乎且復有變夷之望其一從陪侍即厚知隣方幽屏於田閭乃遜傳於典策向也蒙此爵位本出將軍之門今茲譬之宮墻不見宗廟之美但同野老永託化工

又賀再轉左僕射封慶國公啟

冊告天廷位升上宰持兩朝之魁柄得君欣如彼之專

易西土之公圭積善啟有餘之慶股肱既喜藜藿何憂
蓋聞收功不世者必存先定之規揆策未形者寧免不
齊之口况極溺救焚之際豈談河畫餅之時謀夫孔多
當有執其咎者幾事不密得毋害於成乎觀姬公之輔
周暨子產之相鄭或動流言於四國或紛輿誦於一年
使無堅決自信之心而作因循苟且之計京何時而奠
枕鄙曷日而有章宜吾君念昔人慮始之艱求彼相圖
今者折衝之要其誰有一德之享繫我不二心之臣才
之全而識之精既越拘攣之表任之重而恩之厚遂居
輔佐之先雖云舊席之還時乃首廳之輔恭惟僕射相

公舜廷弼直魯國儒真再翊萬幾之繁浸成期月之化
論精神之運固難形容考施設之方或許誦說蓋鎮物
重踰於鼎鼐而決疑明甚於著龜義在敬王故陳謨而
至切美存報上故任怨而弗辭惜邦財則力贊儉圖裕
民力則屢頒寬令登畿一命悉儲可用之材授鉞諸軍
潛易不能之將內脩若此入告可知必將康兆民以蹈
成湯之蹤格上帝以率伊尹之職期天人之協應乘夷
夏之僭來一舉而空朔庭大漢之威以振五遷而治商
亳先王之烈其從此君臣素定之經綸豈中外能窺其
彷彿及功成而效白自心駭而神驚其十五年陶冶之

中二千里門墻之遠化工之蘇群槁其如遇閨之揚大
匠之無棄材自嘆難雕之木但深欣躍莫寫依歸

與趙提舉察院渙啟

從童子六七人於鄉校已觀詢度之駟負才名三十年
於外臺未釋澄清之轡豈聖主顧憂於南土抑明公心
樂於舊游雖慰此民其如公論恭惟某官忠清表於當
世問學窮於古人居憲府則分察之譽高定明堂則諸
儒之議屈歷考正元之士大用已多獨惟魯國之儒外
庸屢試間嘗頌於璽召顧猶待於瓜時中外合辭皆嘆
後薪之居上謀猷趣告即聞夜席之畫前某又此庇身

幾於閱世帶不疑之櫺具尚遠顏辭達高浩之空函所
憂謬誤其如依嚮未易敷云

與趙贛州公稱啟

舊聞暴公子如想見於古人願識韓荊州蓋屢哦於斯
語今依庇不遙於數舍豈懷賢敢廢於一緘共惟某官
學術足以康時威名長於治郡方蠶尾搖毒之後親平
贛水之瘡痍暨佛狸窺江之秋力固朱方之屏蔽久勤
批卻姑聽凝香紛然十邑之兒童爭迎吾父壯矣鬱孤
之臺榭重得主盟顧方倚於崇疆諒難稽於王覲某狎
漁樵於故里在封域之下流日遲浮鷁之遄回首望匡

屏而雅拜其為瞻頌實倍等倫

答林教授仲熊啟

數父執於慈恩之塔踈若晨星訪者英於通德之鄉凜然霜幹雖千里猶當命駕豈同州而廢馳辭恭惟某官儒行配乎先民詩名聞於四海一行作吏非無意於致君再轉為丞乃不容於當路惟薰醲浸涵而道彌廣故敲撼挫握而身益尊盍不歸來適逢西伯之善養輒思免去俄遂曼容之自脩其廉清可以師鄉閭其進退可以勵風俗是為全美寧待諛言顧方注想於九重看即召陪於五叟其遙深聞足之喜適因采薪之憂想鳩杖

之從容獨妨先觀望龍門之岌業敬卜後期區：所懷喋：徒費

答永豐張丞茂遜啟

伏審遠銜王命叅治邑民喜動閭閻威行雁鷺共惟某官地望華顯天資雋明再為丞而處之恬然一得召則進也銳矣迨茲暇日及彼同僚緒澹巖之遺書大明家學式瀧岡之故壠少慰士心非俗吏之能為捨名流而誰望未遑^注記先辱示音俯深感愧之懷更切瞻承之願

答武岡趙知軍伯璋啟

時稱虎榜恍驚四紀之周齒以雁行夢想兩家之盛雖
南北東西之相望而死生契濶之不同陟彼岵以興悲
偶存餘息仰高山而結戀豈在他門但知輔蓋之守邊
未省駮駮之稅駕豈謂先君之友曲憐不肖之孤屈軼
流而賜華緘感今昔而陳至契載窺鄭重增激主臣恭
惟某官清醇忠厚乘之天問學才華傳於世早陪雋軌
擅政駿之聲名安步仕途養間平之德望佐郡嘗聞於
善教為邦不愧於古人大夫皆曰賢已記中書之籍公
卿選所表即頌內史之方某及茲俟駕之時願作執鞭
之計里仁為美况當雞犬之相聞父黨無容何必雉睨

而後見春陽駘蕩玉體冲和期加厚於寢羞用下符於
頌願

回永州葉守程程啟 隆興二年

齒縉紳於闕下熟觀少尹之威儀被襜襜於田間逖聽
大邦之謠頌屬長羸之甫屆諒福履之交綏恭惟某官
學富源流才堪盤錯早濟石林之美浸承文陛之知差
擇登畿贊京兆三王之政選掄出鎮開零陵萬石之祥
惟猷為左右之具宜故中外褒遷之甚寵承宣屬耳威
望隱然必酬督刺之庸誰出君侯之右某二年執別千
里傾風未能注記於江潭徒想凝香於燕寢敢期謙厚

猶念哀窮十人分治於私書絕知敏手一介遠勤於行
李深愧高情惟感激之在中非指陳之可喻

回洪推官燿啟

考氏族於故家知冠江東之籍事鋤犁於舊隱喜蓬幕
下之賢雖車蓋之未傾已心旌之先曳伏惟某官才猷
夙蘊儒雅自將應劇繁若閒暇之時居州縣無淹留之
歎武昌之號多士正由佐吏之才渤海之為水衡寧後
功曹之拜某未遑削牘先辱飛緘坐深愧感之懷行遂
瞻承之志

與龔守直閣濤啟

伏審初反牙璋重分銀菟二千石真秩視使者以為優
三百里諸侯豈炎方之可擬主知異甚民誦歡然恭惟
某官規恢難以小知智畧期於大用胡塵瀕洞猶長嘯
以折衝嶺稜微茫宜望風而罷警申錫自天之寵榮疏
易地之恩豈止疇庸是將趣覲蓋盜興東海而勝之使
及兵散潢池則龔遂歸况漢廷方闕於公卿諒唐制先
求於督刺某世為北客今附編氓清德有餘豈敢奉一
盃之水惠心所及但當賡五袴之歌欣抃於中敷宣固
既

與葛守判院主象啟

伏審帝眷樂郊詔除循吏八邑之民有恃群州之楷在
斯恭惟某官才德兼優人門並妙仕路淹回久矣衆所
嘆咨宸心特達知之親加擢用斗野不離於一道星屏
就駕於兩輻矧茲調守之頻展矣顧憂之切惟弄印靡
輕於畀付故懷章尤極於思榮師帥賢則主德宣姑試
承流之手治理効則璽書勉行參增秩之規某掃軌偷
安灌園自給竊寓公之禮貌敢並他人觀前輩之風流
尚諧素志其為欣懌未易敷云

與趙守直閣不溢啟

伏審帝眷樂郊詔除良牧八邑之民有恃群州之楷在
斯恭惟某官忠恕得於天資才猷周於世用丁年官達
由問學之著聞頻歲外遷以循良而表見向膺三接入
預九卿羽儀天朝方資祭酒之舊德屏蔽王室復賴維
城之雋功惟出處之俱宜非親賢而孰稱既屢書於課
最即高步於禁途某掃軌偷安灌園自給竊寓公之禮
貌敢並他人觀前輩之風流尚諧素志其為欣懌未易
敷云

謝生日詩詞啟

乾道元年

已孤多難欠一死以無求不學少文羨父生而安用豈
謂某官因錫名之初度特取義於斷章驟觀玉振以金

相徐讀文從而字順曳縱以歌商頌慚無曾子之聲讀
詩而至蓼莪空有王裒之涕敬藏篋衍永賁子孫

答胡邦衡啓

某竊惟三有樂之君子俱存為先四無告之窮民幼孤
為重自憐薄命實感格言每值生朝不知死所對鍾粟
而養弗洎清集則那聞蓼莪而涕自流妙謳何有豈謂
某官以貴下賤以賢下愚饋雙玉瓶屈千金諾更推孔
子之忠恕歷叙姬公之太平清談疊疊而不窮雖數筆
端之口華緒遙之大遠恐傷月旦之評然念無言不
醜有倡斯和載維鼎族時乃相門與其借異代以禱祈

曷若即聖朝而揚摧文恭之遇仁祖僅登二府之班全
夫之事泰陵止轄中臺之政孰云吾相乃在我公况虛
左以踰時豈居東之可久堤沙一築甌脫四空二百載
而中天適符興運三千臣而同德永帥群工入衣冠盛
世之圖冠宰相世系之表茲為公論非曰私言

答新江東提刑趙直閣公稱啓

伏審榮易皇華顯趨嚴召循良進擢慶賞公明共惟某
官篤學耻務空言誠心樂施實惠踐揚三紀未嘗興歎
於積薪鎮撫數州所至必封於嘉木再臨贛水尤著治
聲哀冕思其姓名播紳誦其留滯有謀猷乃順於外况

月盈公集
卷之八
宣布之久勤非仁義不陳於前宜論思之是賴由此遙
魯邦之兩社豈惟陪舜牧之四朝某昔望虎頭之堞而
身莫前今瞻鷓首之颿而足不進河雖廣矣寧無一葦
之可抗風輒引之坐覺三山之頓遠方徘徊而挾刺蓋
繾綣以貽書但深感悵之懷莫究願言之素

與郭贛州契敷啟

占風濤之色 期鷓首之上征聞道路之言乃審騎頭
之遙邁失殆同於交臂悔何及於噬臍遙想襜帷倣開
幕府民安新政神介多祥恭惟某官聞學家傳直方自
信明足以知人之疾苦知足以摘吏之姦欺間被異恩

擢臨近輔方善教得民而報上會庸夫挾貴以察州暫
汨讒波罷季布河東之召俄回宸渥復子松鴈門之躋
眷此雄藩足施敏手政倘成於五月缺定補於九卿某
方引分以歸耕豈馳辭而為佞因輿誦之如此特交情
而有云惟意之勤非言可喻

答李監酒次魚啟

戲提健筆優取舊瓊波瀾之獨老成豈應遺恨盡手而
看前輩果復擅場吉語播揚鄉評稱愜恭惟某官體兼
四業用足三冬自合丁年馳駿馬而就熟路胡為半世
著美名而負屈稱蓋厚積者可適南溟而晚成者始為

大器必也年高而德邵自然齒宿而意新舉筦庫之士
七十家無愧外臺之歲貢上公車之書三千牘即聞廣
殿之臚傳步武之亨權輿於此某傾風自昔披投贄有初
秋鷄在天歎老先生之逸興春風得意想前進士之俊
遊既覺心降遂忘辭費

答李本中保義李宜中解元啟

弟兄獻藝臺府登名方剛車分道而行各當一面逮吉
語同時而至實允庶言其人勵志精勤凝姿溫裕既擅
通經之學亦高作賦之才自昔家齊爽已推於二惠竭
從入洛價不數於三張負此雋聲難乎嘉遜用公山而
擢正禮前後適同舉侯喜而知雲長衣冠增勸行唱廷
中之第埽為膝下之榮某特枉高軒寵貽巨軸雖：鴈
序已觀秋漢之聯飛鞞：隸華更羨春郊之並秀其為
欣頌未易名言

答郭贛州賀冬啟

候舒長之日知太平之無愆瞻迎送之雲驗循良之有
助恭惟某官明超龜蔡政捷蒲盧開藩歲月之幾何闔
境歌謠之籍甚順迎陽復泰媿時和豈徒榮祿之具膺
蓋亦善祥之總集登觀臺於魯國姑追視朔之儀款圓
陞於周郊終贊事天之禮某欣逢小至仰祝大來體號

五雲愧難當於華翰令休一笑悵莫奉於清歡

回南安祝知軍深啟

漁竿遠去久浪迹於煙波騎吏實來辱寄聲於嶽牧惟
未忘一日之雅故不吝五雲之書於以鳴謙亦將敦薄
恭惟某官儒雅漢之循吏惠柔周之良翰濟民以政而
何事乘輿摘伏以明而豈資吏鉅平心共理有衆率孚
紛多譽之轉聞曹四聰之簡在郡守者民之帥姑紆組
以少留王朝者俊之廷即牽絲而入侍某傾心盛德屈
指召期逢驛使而寄嶺梅意殆踰於縞紵識歸舟而辨
江樹日俟俟於檝迎

答士人謝解啟

伏審命鄉論秀士升之司徒群吏獻賢書登於天府聽
月評之無間知秋賦之有光恭惟解元先輩毓質粹醇
降才高邵學專為己期為君子之儒仕欲及時聊應主
司之試眷言茲土實異他邦家稷契而人咎繇下視士
鄉之十五德荆騫而文子夏倍蓰門第之三千惟選於
衆以甚艱則拔其尤而可想麗矣騫雲之思緒壯哉倒
峽之詞源鶚在秋天已播少雙之譽鶯遷春谷即聞第
一之傳某幸鬱榮名猥膺盛禮憶盤冊之舊步尚覺槐
忙誦璀璨之新篇不勝草偃感由中積意詎言傳

省齋文稿卷第二十三

省齋文藁卷第二十四

周益文忠公集二十四

啟四

回郭贛州賀正啟

乾道二年

天行有信養生開闢而為春神聽無私正直靖共而獲
 福豈謠頌已騰於四境而壽祺不介於三朝恭惟某官
 剛方足以發晉樽辨博足以重漢席仁心素著何待放
 却郵之鳩智慮所加猶能覆荊州之雪一吹暖律盡滌
 凍塗萃衆美以在茲紛多祥其為徃行陪劍履直上星
 辰某甫治書郵已勤驛使想東方之千騎日斷班春被
 尺素於雙魚愧同畦夏

再任宮觀謝宰執啟

三年去國夢斷朝參再命奉祠喜窺堂帖踪跡已沉於
農畝姓名尚錄於朝廷雖至冥頑寧忘荷載伏念某稟
資極陋殖學不豐本期久次於讐書敢望驟升於載筆
冠沐猴於仗下實愧水官齒路馬於君前常憂山野身
非不遇心自弗安仰繫恤隱之施俯遂投閒之請年豐
令暖無嘆於飢寒日邁月征有慚於夙夜曾經更之未
久而寵任之已加博矣惠施不忍偏慳於數子大哉鈞
播固應塊扎於無垠此蓋伏遇某官魯國儒真舜廷弼
直提兩地兵民之柄贊中天神聖之期三握髮以旁招
畢來俊傑一禿翁而退處猶被恩榮自憐流落之餘倍
感提撕之意某敢不內循尸素圖稱龐鴻司存雨露之
邊難追朝蹟身在江湖之上但祝帝齡

答錢倅五月旦問候啟

風土記時甫應濯枝之雨禮經記候喜來登黍之農觀
四序之無愆知貳車之有道恭惟某官履茲長夏介爾
多祥忠恕所加縱重囚於牢戶濡調不爽斬陰木於山
虞即歸象日之畿大啟景風之賞亶惟公論寧獨私誠
某密托蔭庥載逢穀旦莫綴賀賓之後每勤筦記之先
其在感藏靡容殫叙

回湖南提刑直閣王郎中彥洪啟

資弭一方寵加八使進寓金闈之直實增玉節之華制
命流傳臣工聳動勳共惟某官擅山甫將明之美兼翁歸
文武之才早列奕鳩橫飛於朝右暫提虓虎直指於湘
中殲彼渠魁屈其辟醜爵賞光於當世功名著於景鐘
徐國濯征已賴整師之皇父淮夷攸服行歸淑問之皋
陶某所謁追班久陪步武春銓較藝嘗款笑談逮華翰
之來臨恍舊遊之似夢適聞褒詔倍激懽悰

答生日詩啟

誦哀父母之詩每感左懸之日讀寡兄弟之禮况當右

拱之時曾未釋於端憂敢與聞於贊喜伏蒙某官嗟枯
意重漱潤才清借仲尼仁者之褒發吉甫穆如之詠皇
揆余於初度迄無內美之可言武請受其卒章但有中
心之永佩

與洪景盧啟

謫墮亡何豈舊游之敢記傳聞有喜謂新將之當來念
受塵幸忝於為此則惟梓難忘於必敬輒理久焚之硯
載通執訊之書恭惟某官德配淵騫文規姚姒草紹興
之詔家有其書起大雅之門今無此比自合徑參於國
秉胡為尚攷於民功千里傾風二年引領叔度之來何

暮既騰襦袴之歌君嚴之行勿遲又異事樞之執某側
 聞斯語為酌其中柔此萬邦少展甫申之惠間於兩社
 即追季孟之踪既容陪凝香森戟之笑談復可丐賸馥
 殘膏於造化惘惘所底英晤必孚

回新進士啟

孫逢辰 羅全畧 徐徽
 陳邦 陳夢才 劉濬
 李克

龍飛擢第鳳詔除官親鄙輝光士心慰愜於穆文明之
 代有嚴俊造之科三歲下詔則與郊見天地之理均萬
 乘臨軒則與冊拜公孤之儀等况今皇帝垂唐虞之問
 咨實學而匪事虛文宜子大夫以晁董之才貢昌言而

非徒干祿兩相求而適值一被選則為榮某官天之降
 衷固殊學以為己尤至凡著在簡編而甚富皆措諸事
 業而可行宜其出谷敏於遷喬取青易於拾芥俊傑出
 我門下豈惟座主之榮英雄入吾彊中想見天顏之喜
 載仰儒先之蘊詎專科甲之求惟聖朝重此以來名世
 之英故志士假之而作致君之路尚據賢業迄副鄉評
 某僻處郊閩猥勤鞭馭瞻泰定之字固應輕萬戶之侯
 味春容之篇殆類鬻九戎之鬘其為欣感未易敷陳

回郭縣尉有憑啟

伏承龍飛乾五象近魁三聲氣相求將入風雲之會衣

冠不乏實增鄉里之榮蓋聞所難逢者茲謂昌期不可
掩者其惟宿學故運有千齡之篋而金須百鍊之精方
武帝初年求賢良之奇士宜孔門高弟在德行之魏科
某官造道醇深績文瓌麗仁先難而後獲農力穡而有
秋主司不能信人久之昌黎之薦士天子自為座主適
逢唐室之右文靡需南省之蘭自折東堂之桂賦五色
而遺矣初何病於李程讀子虛而善之宜深嘉於司馬
已膺親擢即慶超遷某特枉新篇曲敦舊契異時場屋
雖容揚批之在前他日宦游何害積薪之居上併陳善
頌以答好謙

與錢吉州瑞英啟

管庫中都早識名郎之面躬耕北陌將依賢牧之仁念
睽違一紀之餘乃庇覆二天之下逖聞犯輶遠劇搖旌
恭惟某官德度粹溫儒猷通敏既將相侯王之有種亦
文章政事之傳家締睿主之深知昇价藩之重寄仁風
揚發預多必偃之民惠露沾吳行廣幘幪之潤遂由熊
軾歸從雞翹茲朝士之公言非邦人之諂語某遲聞新
政快滌塵心一薤置前豈敢助漢陽之治三篇轉上或
能興益部之歌欣頌於中敷陳罔既

戲答錢倅

某比貪求益輒復言詩辱誨答之勤渠省愚衷而愧慙
恭惟甲族實冠聖朝系出真王世為右戚吳山裏繡帳
何止於銷金秦地吹簫對豈須於低唱殊非筆誤端是
寫真既蒙叩鄙之言輒効解嘲之對

回添差通判趙朝議不韋啟

視秩列卿自應典郡興懷先壘力請監州雖有榮觀苦
無公事諒假潁川之軾以光京兆之阡恭惟某官才華
賀白之儔德望間平之亞飛騰久矣更歷三輔之元僚
議論卓然常備十連之上介將受維城之寄暫榮展墓
之歸地置萬家已驗寵摹於韓信木生連理即觀瑞應
於蔡邕某方治書郵先勤牋敬託治中之庇豈惟日見
於老成從方外之遊尚冀時親於益論

回李世南秀才 七月五日

試倚馬之言昔已披於巨軸賦高軒之過今復誦於新
篇愧無尺寸之長虛辱再三之貺身方抱拙何絕徑之
敢知分合投閒於提衡乎何與但珍瓊玖永賁巾箱

回蔡吉州洗啟 乾道三年

河橋三歲共聽朝雞江國一麾行逢畫鹿念昔卜隣之
好乃今託庇之階其在懽悰豈同常品恭惟某官慶曆
諫臣之後中興廷尉之甥問學有承殆曾門之是似慈

祥無害豈完相之不如適丁重外之時遂作先之計
少勤敏政別奉除書歷帥守而造侍班益聖朝之新制
選循良而補鄉闕亦神漢之舊規士無間言公有愜志
某比緣薄遽稍緩馳詞聞千騎之鼎來想前驅而夢去
芳春紀益和氣應時願於啟處之間益以保綏之厚

答永豐魏宰希文啟

命車三徑誰顧陸沉占吏百函獨勒泛愛拭病眸而快
讀積感臆以中藏伏惟某官蘊撥煩理劇之才得學道
愛人之旨分竹符於炎嶠嘗布恩綸執轂壁於江鄉乃
迂塗輟雖百里少卑於千里而近邦殊勝於遠邦與其
國叢爾而膺輻蓋之名孰若縣壯哉而享絃歌之樂况
易流於聲實諒滋速於褒嘉尚養願龜用蕃晉馬惟瞻
期之至切非宣寫之能周

除南劍答雷州蕭守翬啟 乾道四年

投閒歲久敢嗟太史之留起廢恩深厚在諸侯之選念
戎期之尚遠通筦記以未遑豈謂執謙特形贊喜恭惟
某官才猷天稟學問躬行早溥誦於聲華駸發舒於事
業群公交薦多績日宣嶺海分麾籍甚桂林之伯雲山
動興優哉桐柏之祠惟承宣之譽素高且睿哲之知彌
厚好無事職豈容遠慕於杜欽喜有良翰正恐近求於

申伯行趨迅召立上要津某竦聽辦嚴首圖廷勞惟瞻
祈之至切非頌述之能周

答郭尉有憑羅司戶全畧啟

六年退屏蹟收供奉之班一命俯加名玷附庸之國雖
上聖匿瑕之賜亦諸賢推轂之私恭惟某官厚德好謙
懿文行遠篤噓枯之雅意橋激潤之芳詞何取陳人遠
貽新語念放浪山林之久詎堪雍容轄蓋之間矧四體
可勤猶之在前之知略豈二毛已受敢思治郡之功名
幸尚遠於戍期當徐伸於祠請仰酬嘉貺聊存忱言

謝生日詩詞啟

鄭伯驚姜載感寤生之日僖公保魯敢當純嘏之詞方
一舉足而懷罔極之悲乃九頓首而拜非常之惠假壽
鄉之新說奏文囿之奇才儉異禹型真獲太牢之饋喻
同稼穡正資一溉之功翰墨易殫感銘難既

答胡邦衡啟

胡大書魯太師樂為予生日壽乃用其啟中語戲答

言念生以敦牂首寧大有月惟夷則物豈無傷正爾早
衰居然永感豈謂屈金殿論思之手揮玉堂勁健之毫
比之衛賢者之官寵以魯太師之樂秉籥翟而錫公爵
雖不足以事王執同律以聽軍聲顧敢忘於詔告仰承
嘉命來賁孤踪其在感悰并需面叙

月益公集
卷之四
八
答廖英州遠啟

引分投閒久安農畔叨恩起廢適在士鄉既未臨洗印
之期難驟展事賢之禮音郵遠暨感臆中深恭惟某官
夙蘊儒猷素隆士譽景行了翁之抗節服膺中立之存
誠比佐藩條適逢冠警繕甲兵具卒乘既坐絕於蔓滋
出幕府持旌麾曾未移於桑蔭若時嘉績方簡睿衷佇
頌一札之書進補九卿之缺某日遲取道首冀披風惟
瞻邈之甚勤非指陳之可喻

回梁提刑竑甫啟 十月

問舍初年尚記尊史君之嘉惠躬耕末路喜聞新使者

之先聲謂因肆觀而必留故緩雙緘而未遣逮茲拭目
寧不嗟臍恭惟提刑判院出相門而敦寒素之風富天
分而勵精勤之操形於德業蓋端良溫厚而有餘發以
詞章宜瞻蔚瑰竒而絕擬允矣克全於衆善胡然屢乞
於外庸茲由江介之封早賜先公之履十城父老歌西
平有子之詩八境山川留召伯甘棠之化姑慰戎昭之
望更增臺治之光何待政成即陪禁直某方樂庶慶之
晝掩莫知英蕩之宵馳未瞻負弩之驅已辱夢刀之慶
感慚斯甚宣寫奚周

回得解士人啟

皎：白駒而在彼空谷久聞鄉譽之高呦：鳴鹿而示
我周行果預計偕之寵一傳榜帖四協輿言恭惟解元
先輩學通衆說之郭文號諸儒之倡惟其負勢莫當之
勇是以收戰必勝之功閭里嘆咨親交慶羨冠名南省
繼歐老之遺風策第太常合鷺洲之舊識士所望者君
其勉旃某特枉長牋仰欽厚眷綴梁臺之響幸目擊於
俊遊傳漢殿之臚尚耳聞於吉語

謝生日詩啟

乾道五年

四五十而無聞焉方悲鯉饋九萬里斯在下矣敢借鵬
風惟古今善禱之非虛皆人士誠心之所寓儉勤化俗
則豪眉詠於豳風豈弟宜民則台背形於魯頌豈伊大
既乃及小夫此蓋某官仁惟好人喜故溢美篤吹噓之
雅意貽比興之新篇愛欲其生雖不稱老彭之比壽胥
與試願同依堯舜之仁

回新進士啟

伏以我后勞於求賢蓋三舉矣吾州慨然上對得五人
焉繼前輩起家之榮為後生稽古之勸舉有愜志曾無
間言竊惟致治之由用儒為急昔者三王而上確乎一
道之承異端興於七雄始綴甲兵而譏書策大亂極於
五季專用鎗劍而鄙毛錐觀歷年長短之不同則擇術

是非之可見今醜虜尚汙於中土而重兵未徹於近邊
常情皆言用武之秋明主獨切右文之念思多士生此
王國豈徒誇三年應詔之多有一德克享天心實欲冀
異日行言之實使齊疆復歸於魯而晉盜悉奔乎秦儒
効若斯武功何有孰仰當於睿意良有待於儒英恭惟
某官躬邁往之資擅博聞之譽以通經而拾地芥固所
優為由舉首而破天荒殆同創見况隸萼繼登於虎榜
而萊衣同拜於鯉庭家慶方來可驗斯文之力邦榮有
待竚恢所學之功某贊喜未遑馳辭先辱鹿鳴歌而揚
侯舉已預榮觀龍標奪而盧肇歸更逢盛事其為欣幸

未易殫論

回江西任運使文薦啟

上閩南之一節已彰畫錦之榮周江右之三臺更示宵
衣之眷既聳吏民之觀聽益增軺傳之光華共惟某官
德粹而莊學醇以博行已勵廉清之操立朝高忠肅之
聲臺省要官踐揚殆遍漕刑劇寄績効屢聞復瞻舊游
重盼新渥列郡熟知於威惠不令自行近班僕俟於英
賢言歸可待某一違和氣六換嚴冬望孔翠於層霄笑
駕駘於故步尺書懇：雖疇昔之僅通大旼謙：愧今
茲之倒置其如欣感未易敷云

賀錢守冬啟

梅放柳舒樂土春回之有象土輕衡仰明時氣應以無
訛孰闔壽祉於一陽盍酌頌聲於千里恭惟某官承家
忠厚敷政仁明久昭列宿之華游洽介藩之譽袴襦騰
頌視叔度以無慙散冕為褒舍喬卿而奚稱德逢道長
福以類升某副迹此塵傾心侯宅官僚交慶豈野服之
敢參鉛槧馳詞尚誠心之少致

回太守賀正啟

乾道六年

東風凍解知和氣之先春南國教明諒嘉祥之集篤惠恭
惟某官敷施上澤安輯民生力行寬大之書藹著中和
之譽順迎獻歲行趣朝元屬雪戶之億居阻牙門之旅
進首勤慶問良極感悰

又回萬安謝令啟

日會諏訾杓攜龍角蠢然品彙俱有向榮之心卓爾仁
賢豈無為善之福恭惟某官神民所保年德又新奕世
詞章常夢生塘之草三年桃李重開滿縣之花行陪春
見之宗入奉夜前之席某尚稽走慶先辱飛文屬野性
之多慵致報緘之稍緩其為愧感交劇矜膺

與廣西經畧張檄猷啟

茂實飛騰耳熟桂林之伯窮簷局趣夢遊訾氏之洲遙

知五筦之兵民欣頌十連之師帥邊疆清晏祉福綏將
恭惟某官學殖崇高智符廉正竭從別乘姓名已達於
宸廷旋駕輶車風采遂傾於嶺表開帥牙而即拜貽禁
職以頻遷訖共外庸方倚田侯之績式是百辟即過山
甫之歸某披霧尚賒傾風更切雖衡嶽元回於乘雁而
灑江不礙於雙魚憐之私喋之奚既

答吉州新倅趙朝散堽啟

側聽詔除來參邦治風颿遠涉阻修惟梓之恭騎吏鼎
來先辱摘華之麗一謙過厚三復增慙恭惟某官廟璉
凝姿澗松挺操政術久高於吳會典刑未替於洛京眷
此廬陵雄於江介顏魯公之鯁挺尚屈佐州向文簡之
才猷亦勤監郡雖小淹於遐武諒遠繼於前模某從事
無堪乞歸甚切行同野老重詠海沂之功更僕召環敬
酌齊人之水

除閩憲赴闕奏事與宰執啟

坐廢八年莫瞻上衮安居三逕每荷大鈞雖依歸造化
以甚勤而通徹姓名之無路忽叨進擬倍劇兢慚念扣
閣以非遙愧達函之已後伏念某少而孤苦長則迂愚
但信一心欲致身名之泰逮更多難乃知骨相之屯得
未足以償止譽不勝於積毀竭從幽屏痛悟昨非甘為

灌園負耒之遊寧復結綬彈冠之望豈謂起之野服假以繡衣惟盛世難逢非不抱賤貧之恥惟軺車甚寵非不貪禮樂之華顧才諤之無堪且病衰之有素冒陳私悃游賣公朝當文王之作興適伊尹之自任有來多士共圖王室之寧不使匹夫獨隔聖人之澤遭逢若此進退何居恭惟某官皇極為心泰和斯世身兼九德不以尚人士挾寸長豈容在野善類聞風而望賜治功指日而格天如某者何足記憐亦叨收拭始逡巡以避蓋自揣於非材今竭蹶而趨懼固違於成命倘得一登九級之陞退望三槐之庭雖汰斥隨之而志願償矣天暑未

艾巖瞻正宗冀加御於鼎珍以永隆於邦棟

除少蓬答史徽州侯啟

持節分符已叨起廢登瀛視草更許參華揣分量以無堪啟緘滕而有覲此益伏遇某官仁心念舊義槩噓枯曲憐流落之餘每借游揚之助遂令新渥併及陳人載惟兩郡之政聲久在一時之課最民之攸暨恐非賜金加地之可酬王曰適歸竊意鳴玉朝天之甚適倘寬汰斥尚幸瞻承茲粗答於多儀殊未殫於鄙志

答吉州太守呂治先大器啟

昨審拜州旋聞開府俯稽衆論固當陳何暮之謠久受

一屢又合致必恭之禮屬疲精於道路加庀職於闕庭
力有未遑心焉不置逮疊勤於翰墨幾莫措於面顏恭
惟某官躬稟異材家傳典學分麾兩郡課以最聞列屬
中臺譽隨日起眷東南之上郡實六一之故鄉調守甚
艱非公莫可銷民愁嘆將見古人之風戢吏矯虔更觀
仁者之勇某雖未獲依豈弟慈祥於里閭之內猶庶幾
誦中和宣布於搢紳之間尺牘所陳寸誠奚既

回寧國守姜待制啟

遇雙旌於吳郡僅容漫刺之通望千騎於昭亭未暇空
函之達忽披紫問增愧懦衷恭惟某官望重簪紳眷深
旒宸宜服四隣而熙載豈容一日而去朝適是名藩因
於巨浸輟嚴徐之侍從倚召杜之蕃宣惠政甫施顧憂
旋釋雙溪疊嶂亟賡謝守之詩四牡介圭行趣韓侯之
覲某比自漁樵之侶來參鷓鴣之行念揣分以非宜方
陳情而引去欲酬大旣莫措片言姑陳感激之私少答
記存之厚

回李秀實發啟

垂釣江湖久斷脩門之夢牽絲館殿再追雋軌之遊遼
巡何止於三辭荏苒已踰於半歲推鄉評而有自修謝
牘以未遑忽披執訊之書曲借過情之譽禮文倒置愧

感中增恭惟某官學造乎微才周於用治効早彰於四
 邑政聲尤著於五州當馬授據鞍之秋堅陶公運甓之
 志衆期明陟事乃暗投吏疑絳老之年晉卿有罪上讀
 子虛之賦蜀監非人載惟貴齒之時仍在急賢之際朝
 冠暫挂未妨新組之頒塞馬重來即慶舊種之復願究
 觀頤之理亟承傾否之休

答巫樞密謝復職啟 乾道七年

上眷舊勞制加新渥冠六閣邃嚴之職遂二疏冲退之
 懷褒語一傳輿言昏穆恭惟某官英規表世與學邁倫
 用之則行殆侍從弼諧之編歷已之無愠顧卷舒窮達

以何心將觀妙以怡神寧待年而佚老茲推郊賚載簡
 宸衷規字西清雖未盡輔臣之寵數角巾東路固已追
 前輩之風流惟壽祉之方增諒恩華之繼至某未諧納
 謁何敢占詞荷謙德之有光飭誨存而先逮傳子孫而
 榮沛即逖瞻廣德之垂車在機密而歸東平徒羨鄭均
 之賜穀其為欣感交集襟襟

遷禮侍回外路啟

貳圖書之府久愧空餐聯筆索之班更叨虛授自知過
 矣謝則使然此益伏遇某官以揚賢為心推達人之志
 靈河滋液助成濡涸之功和氣薰蒸陰假噓枯之惠遂

容叢品亦玷高門修謝牘以未遑辱華緘之先逮其為
感愧豈易敷言

回李賢良庭啟

君人者勞於求賢孰當明旨子大夫哀然為首獨副詳
延富哉八千言甚偉之文應此七十載久虛之典冕旒
動色韋布增光竊觀聖朝最重制舉藝祖當艱難創業
之際已設三科仁宗享盛大持盈之期至頒十詔惟所
詢皆當世之要務故所得率一時之異人乃知用儒納
諫之極功豈以右武好文而殊轍天之未喪文不在茲
恭惟某官博洽本於家傳精勤克乎天性賢人事業罔

不窮探流俗施為未嘗肯顧積歲心潛於載籍一朝名
震於京師維昔眉山有如蘇氏明允抱才而不遇文忠
勵志以有成肆惟黃門亦紹素業謂古人不可作矣而
今者曷其繼之豈無他人適在同即况尊公方正之學早
為先達之所宗而難弟功名之心方勉後圖而未艾猗
猗中興之盛際復嘉佑之遺風某託契頗深締交恨晚
討論盛舉幸預於司存臚句廣廷復陪於山立曾未遑
於展慶乃先辱於檄詞惟欣感之交懷匪叙陳之可究
謝生日詩詞啟

乾道八年

生我劬勞方切蓼莪之感錫公純嘏過勤黃髮之祈高

月益公集 卷之四
誼重於丘山正聲諧於金石穆清風之誦固知鴻筆之
有餘投明月之珠所愧哀蹤之弗稱但深銘佩莫究叙
陳

回添差整務通判鄭通直著啟

載頒詔墨參駕屏星惟議論聲猷是為倚重故簿書期
會非以煩公恭惟某官守道篤齊魯之風窮經承漢唐
之緒貫險夷於一節隆望實於二車肅、旆旌寅餞未
離於舊治紛、候吏懽迎已及於新疆少須坐席之温
別奉細糧之問豈特兩持金節榮踐世官固應三接彤
廷茂摠賢蘊某投間於此依庇有初識士龍於雲間佇
爭先睹陪司馬於方外尚託後塵脩慶問以未遑辱緘
書之先逮其為欣悚交集襟悰

答豐城羅主簿全材啟

唱第彤墀起家黃綬仕有近鄉之便官無待次之淹喜
動交遊光生里閭竊以文風之盛固在是邦家學之優
獨推甲族師友淵源之遠父兄誨誘之專居有寔能殆
無虛榜某官氣由直養學以勤精稟温柔敦厚之資富
群怨興觀之識擅經魁者三世聲譽卓然登科選者六
人歲時屬耳發軔鈎稽之職問津華要之途氣徹斗牛
難遏豐城之劍枳棲鸞鳳佇旌仇覽之賢某未暇馳詞

先勤飛翰索枯腸之易涸嘆巨筆之難酬愧感交懷敷
陳罔既

回吉州葉守程啟

竊吹西崑親慶虎符之出服勤南畝倣瞻熊軾之來風
動棠陰春生梓里恭惟某官輔仁以義好學而文政事
詳明本躬行於家法聲華赫奕久獨步於仕途佐吳京
則彈壓之效隆鎮楚會則循良之功著尚迂逸駕載蒞
劇州益貢輸獄訟之繁非游刃孰能濟此矧疾疫旱荒
之後惟福星可以庇之帝意則然詔除甚寵朝方信賞
公且適歸某甫辦尺書猥勤大貺索居無賴顧何幸於

依劉靜治有餘諒不勞於舍蓋欣愉之至敷述奚殫

除富沙答傅運使自得啟

乾道九年

鷓退飛者六正倦搏風龜左顧者三屢勤刻印戴上恩
之彌厚省愚分以何安屬困負薪未遑削牘乃屈乘軺
之重先貽執訊之書大貺逆施感悰中積恭惟某家聲
赫奕天韻高明文華足以穆皇猷智畧足以參國論問
津錦帳將夕拜於瑣闥遷轍繡衣聊晝行於閩部公既
知人之情偽人亦稔公之聲猷諒無刺舉之勞坐奏澄
清之最遂班適列益告遠猷某久矣傾風行焉受察居
閒從仕一生自笑於苦心多病非才二事恐煩於并案

依歸之至敷述奚殫

謝余監場生日水晶環詩啟

四十九年往不可復方哦太白感秋之詩千二百歲形
未嘗衰乃佩廣成修身之喻禮將誠而兩厚物與意以
俱新生我於水晶之宮已慙實惠報君以青玉之案更
愧虛拘循雅眷以難忘服嘉言而無斁

回衆官生日詩啟

倚團蒲而坐長夏昔迷自恣之途數圓著而感流年今
學知非之步猥勤高誼特枉雄篇增風木之深悲重霜
蓬之永慨千歲而壽無害敢當黃髮之祈三嘆而音有

遺徒味朱絃之美其為感荷交集襟悰

省齋文稿卷第二十四終

省齋文稿卷第二十五

周益文忠公集二十五

啟五

答陳贛州啟 淳熙元年

吳京結綬僅接步趨閩嶠分麾幾相先後方嘆追攀之
 無路孰云廷勞之有期望千騎以欣然拜雙魚而愧甚
 恭惟某官學窮百聖才冠諸公著在詞章發雅頌典謨
 之秘形諸政術適剛方柔惠之中久振譽於從班洊宣
 勞於制閩雖名高而忌者衆顧望重則眷愈深宜晦朔
 之再更而珪符之三易十年生聚允賴於撫摩一道韜
 鈴兼資於整暇諒兵民之胥悅即揆岳之迭居某去德

終星傾心披霧得孟公之尺牘固竊榮觀居太丘之鄰
城更依靜治其為感幸豈易敷陳

答吉州倅趙朝奉謙啟

閱別駕之題名昔固多於賢士膺二車之遴選今復值
於通材方圖慶牘之脩已辱書牘之既恭惟某官中和
迪德清白承家撫字有方課屢優於劇邑周旋無滯績
常底於近畿宜仕王朝乃參郡政將令向丞相之舊治
獲觀清獻公之遺風仕雖稍淹民則何幸某別德五年
之久心不謂遐依仁三逕之中喜而忘寐即期良覲尚
冀珍調

除殿撰答保昌羅縣尉維藩啟

投閒詞館久為版授之禿翁貼職書林忽廁金閨之諸
彥戴上恩之過厚揣愚分以難安豈謂某官獎善為心
鳴謙勵志屈君房之妙語賁莊叟之陳人矧是頻年疊
勤辱賦讀二十篇之策已擊節於宏才論千萬世之榮
更服膺於絕識顧缺然而無報徒惕若以懷慚

答楊壽仁謝解啟

越在妙齡驟膺高薦賈誼用能書而稱於郡彼已後於
二年揚侯當始冠而舉其鄉今更先於四載庭幃悅豫
譜牒光華解元天與雋拔過人之才家傳䟽通知遠之

教中都名士猶云折輩行而與游同里諸生疇敢露鋒
鋌而角勝果中有司之式即觀天子之光某昔陪乃公
游翰墨之場今見即君赴功名之會身雖老矣心則欣
然荷飛蓋之來臨閱稿詞而增感

答甲午解元而下啟

而下有墨書作劉德禮啟

率馬以驥來空北土之群化鯤為鵬往運南溟之翼一
時得雋萬目注觀解元先輩學有淵源行無瑕玷月旦
素推其名譽秋闈果壓於英髦載窺筆下之波瀾足見
胸中之錦繡先鳴南省應同六一之無雙首唱東堂寧
復冲之：第二方圖展慶已荷稿詞惟欣感之交懷非

叙陳之能究

答蔭狀元騏啟

淳熙二年

六事咨詢方求殫洽一言寤合遂冠倫魁喜動天顏歡
傳士類竊以得人衆寡闕世盛衰方試藝於廣廷初莫
分其賢否逮收科於異等乃舉集於英髦觀蘇氏之遺
書歎仁皇之多士其在鼎甲者垂四十不為公卿者纔
五人惟其獲助於皇天是以生才於王國厥今盛際與
昔同條某官學足以窺聖經材足以應時用平日著鄉
閭之望一朝居俊造之先事業文章其誰不信功名富
貴夫豈易量某甫趨龍尾之階適際鰲頭之選方將贊

喜已辱飛文佩謙柄之相先激感悰而無斁

除待制回外路啟

扶犁南畝久作老農簪筆西清復陪諸彥處非所據愧不自任恭惟某官才名冠於公卿治行高於方岳以牧民之餘裕推好善之誠心曲憐起廢之蹤特借噓枯之語一緘甚寵三復多慙欽惟願治之朝實賴得賢之助鵜濡其翼乃理之常猴沐而冠夫誰不笑縱人言之姑捨豈自効之敢稽乘下澤之車將懇酬於素志重高門之地當敬避於真才因叙感悰并伸善頌炎蒸甫爾啟處何如益冀珍調茂迎寵數

回胡邦衡謝龍學啟

河圖峻職已冠時髦廬阜真祠復優廩假辰良拜命賢類均歡竊觀累聖以來最重西清之長或解天官之常伯或辭翰苑之主人欲賁其行始加此職然猶考平時之望實亦復稽在服之歲年自非光前絕後之巨公未有躡至徑躋之殊禮恭惟某官爽邦壽雋華國文師天子倚以弼諧時人望其平治應五百年之昌運久宜當路於王朝進十二等之清資姑復假途於禁闥某倘寬簿責尚及班迎敬酬大貺之臨併効小夫之祝

除兵侍回新闈漕傳直閣啟

少而不武益素惜於甲兵老矣少文敢與知於翰墨而
 游叨碧落之真拜再遡紫清而上征自視闕然胡能當
 此茲益伏遇某官推達人之志存獎善之誠力借吹噓
 助成僥倖曾感悚之未布辱榮問之相先惟昔分符不
 獲庇身於閩嶠逮今持橐所期接武於吳京何駕駘立
 仗以常留致鸞鳳覽輝而未下公言弗釋定須季子之
 來歸私義難安正恐曼容之免去悵焉永望言莫能彈
 回夔路提刑啟云力借吹噓助成僥倖更先勤
 於榮問彌有激於懦衷愧荷交深敷宣罔既

回漢陽趙守象之啟

淳熙三年

以間平之望分漢沔之符條教一頒懽謠四達恭惟某

官才堪盤錯學造淵源久宣膺仕之勞倣被專城之寵
 既昭民譽即簡上知獎勵有加豈特用前規而賜璽選
 掄可卜固將遵近制以為即曾修慶之未遑辱台緘之
 先逮更敦曩契俯記衰蹤作者七人想秋闈之如昨凜
 乎六馬驚夜夢之通神感懌交懷敷宣罔既

回許校書蒼舒啟

上對鰲扉升華麟省雖三年議禮品秩已高而七畧讐
 書播紳尤重詔除一下文譽四馳竊考祖宗之朝甚嚴
 館殿之選居中乃記言之捷徑在外仍帶職之優恩惟
 其舉異於司存是以必從於試可自頃典章之革例為

職事之官然猶畧放前規示存故事文儒之外他岐其
可進乎禁近之聯假道而升多矣向聖上尤艱於此選
計歲中特召者幾人不有英髦孰當推擇某官博文而
約禮達古而通今人久望於登瀛文果成於翻水軍旅
貨財之說滾：不窮誕謾苟且之風慘：而論觀筆下
之如此知胸中之浩然宜甫上於奏篇即誕頌於寵命
蓋飲聞俎豆之事故薰炙簡編之香寧少誥於班資將
益克其器識某方圖展慶首辱擣詞坐深欣感之懷更
效遷陞之祝

回施贛州元之啟

遠勤碩望出領雄藩幕府一開懽謠四達恭惟某官道
參前哲名在近臣宜入侍於邃清乃游臨於藩翰惟昔
仁皇之盛若時清獻之賢輒自諫坡往分符竹既陔條
於鹽法仍踈鑿於贛灘嚴而不苛治有餘力泮水設瞻
依之像遺愛未忘鬱孤存望闕之臺流風可想旋由課
最歸振霜威公豈後身理何共貫某方圖往記已辱貽
緘惟欣感之交懷匪叙陳之可究

回鄭校書鑑啟

茲審萬言對策仰契宸心四部讐書旋膺除日英賢得
路館閣生光竊觀炎漢之興無若孝文之盛既首除詵

謗妖言之罪又親策賢良極諫之人下情日通上德時
茂賈山其言多激切善乎指事之詞梁傳所陳畧施行
美矣移風之效惟今願治與昔同功某官端勁有隱巖
之風博稽傳通德之業身方游於太學人皆許以諍臣
有司徒知音於程試之間天子獨見器於對揚之頃奏
篇甫上紙價驟增帝罷統軍之麻何慙祖烈我識尚書
之履行紹家聲曾是登瀛寧非假道某與觀盛事猥辱
華牋佩謙德之過優激懦衷而增愧

回趙富沙善俊啟

就錫麾符改臨藩鎮誰非典郡幾人榮奉於親輿矧是

便家千騎鼎來於隣壤上隆恩渥士豔寵光恭惟某官
器度恢闊風儀峻整雖挹天潢之潤自舉閨彥之華屢
訖外庸政頻追於召杜入居適列班即綴於嚴徐慶禮
未修書郵先暨意非言而可盡感與愧以交深

回周廣州自強啟

伏審輒從近侍出殿遠藩蠻夷多貪藉公玉雪之瑩法
令素弛倚公權衡之平上意則然輿情以懌恭惟某官
文彩似舅廉平亢宗周旋九卿堅守三尺澄按數路靡
欺四知暫領帥符行歸從橐江氛嶺浸固有望於廓清
龍戶馬人諒益增於壯觀某尚稽馳慶先辱飛文感愧

交懷指陳難喻

除吏侍回外路啟

侍從通班久負瘵官之責武文迭試更叨換部之榮仰
愧主恩俯慙公議茲益某官仁心及物義槩光朝屢訖
外庸河決京都之潤遙分餘蔭春回朽木之枯遂使非
才亦塵異數曾占詞之未果荷貽問以相先其在感悚
曷勝言喻

回胡校書晉臣啟

淳熙四年

擢秀西州分光東壁英髦在列館閣增輝切觀漢朝初
顯蜀士益山川鍾英傑之氣故郡國產俊明之才惜文

華之有餘而道義之或缺王褒待詔止第頌於離宮何
武習歌空罷歸於宣室諭意焚中者文斥邊之過校書
天祿者貽投閣之羞既何補於國家亦見輕於鄉里慨
前規之無取嘉盛世之有人恭惟某官質厚而氣清學
醇而文麗簫笛應雅鏗爾咸韶之音圭璋璧琮溫其郊
廟之器比遠祗於驛召姑小試於闕才因古三流喻今
一體極論憂勤之要兼明利害之原謂守將皆得其人
則兵民兩獲其利願天子以清閒之燕俾群臣言成敗
之機豈徒寧輯於坤維自可規恢於宇縣奏篇甫上茂
渥遙頒聊假道於校讐即問津於華要某幸叨發策喜

際登瀛辱墜賦於長牋實銘藏於厚意屬緣移疾致緩
馳詞尚惟高明有以原恕

除內翰回外路啟

寓直非才深慚久假出綸示寵遽忝為真觀顧視草之
臺羞縮扶犁之手此益伏遇某官恍恂推轂議論噓枯
仁能好人已著成名之美謙有終吉更推平施之心遂
使迂愚亦塵華要某方圖記往首辱飛文蒙瑞霧以遊
行固多潛潤對清風而肅揖自滌炎蒸感幸兼懷敷陳
罔既

回江東徐漕啟

待詔無堪久慚假寵疏榮有腆忽冒真除薄材積愧於
妨賢厚禮首勤於削牘一謙過矣三復赧然恭惟某官
志節清修風猷警邁學雖專於為己道不廢於愛人應
義理之文固宜視草有澄清之志聊復登車矧嚴徐久
在於漢庭豈頗牧不居於唐禁居慙末至日異同升旋
面望洋難免大方之見笑汗顏血指焉知巧匠之傍觀
感作交深敷宣罔既

回李大著原啟

伏承策勛東觀正位承明惟此官乃侍從之階故今代
以選掄為重昔人之進者固多矣蜀士之賢者可考焉

淳夫在元祐之時莊叔當紹興之末皆歷大著作之任
遂為修記注之官以公之才何彼之愧承天未老固無
乳媪之譏孫綽可稱允為文人之冠矧惟鉅美方萃高
門父子並兼史官古今無此榮遇蓋談遷未始聯事而
彪固亦非同時崔駰三世相承止於傳業應奉五葉不
絕姑曰承家豈若無異論於三傳之中施隔屏於一堂
之上行並儀於禁路實增煥於周行某曾直玉堂嘗勤
蒸翰以為行慶超遷之命是故少稽酬答之言今雖愧
於後時竊自欣於先見即期展謁聊復紆誠

回廣州周侍郎自強啟

政成南越既許借留班正西清宜膺蕃錫棠陰雖舊宸
綽載新恭惟某官厚德鎮浮高名蓋世十城士卒久服
恩威五嶺蠻獠舉安教化惟治聲之素仰故恩渥之再
來六閣外遷姑用皇朝之制三公入拜即稽漢氏之規
修慶未遑貽緘先逮其為欣感交集襟臆

回温州陳尚書彌作啟

起從家食薦畀藩條積平海之去思歌永嘉之來暮惠
周兩郡眷厚九重恭惟某官禁路耆英清朝名德論思
獻納夙罄嘉猷輔相彌縫久應大用尚煩汲黯坐嘯南
陽竚由輻蓋之間躡置廟堂之上公言所屬召節何遲

某猥辱飛緘愧稽馳慶仰佩謙勤之德俯深感悚之懷
回隆興呂少卿企中啟

民欲精微擬上借留之請天臨昭格已疏勉勵之恩棠
陰不改於庇庥芸閣有光於論議十連增重九牧向方
恭惟某官實茂而聲英中閱而外肆故家遺俗具知文
獻之存熟路輕車見謂經綸之蘊伸體國愛君之術旌
牧民御衆之才仍舊貫於南州姑勤宣布次近班於東
觀寶兆論思某特勤錦繡之貽愧乏瓊瑤之報遐阡適
陌想耕桑樂歲之餘南浦西山羨風月良辰之賞其為
瞻頌罔既敷陳

回閩路監司啟

起家甚寵既察鄉州易節維新不踰隣境出入按臨之
內光華跋履之間風采聳聞懽忻周浹恭惟某官炳靈
峻嶽尚友先賢導淵源於禮樂詩書出緒餘於文章政
事駕言東瀕固嘗廩實而貨通旋選南閩可謂車輕而
路熟念觀風之浸廣諒策足之有期率屬蓬山隔坐當
仍於近事問津某路緇衣遂踵於前規某過辱先施深
慙不敏雖未克於報贖尚即繼於慶辭情之所如言不
能盡

回劉正字光祖啟

光膺宸檢進列英躔除音甫碩士類胥悅竊以辭章既
敏初何待於考觀器業已成尚奚資於涵養然聖世重
典常之守抑仕途榮館閣之登故先小試於禁林然後
橫翔於冊府恭惟某官譽高全蜀文中甲科有用之材
所居可紀無窮之聞隨日以新昨萬里以賜環指三雍
而振翼朝推俊望人嘆博聞姑飄弱水之風即扈甘林
之駕况審官進秩已漸於亨途而慶賚及親又符於孝
治薦紳改觀家國同休某猥預榮觀過勤遜謝給相如
之札欲為力以何施美崔氏之莊在貪功而豈敢其為
愧荷罔罄敷陳

回袁秘丞說友啟

輟掾西樞轉丞東壁切考在昔不輕此除肇自魏朝典
尚書之奏事逮於梁日為天下之清官不有偉人孰當
遴選某官風規秀整器度恢宏學探左右之原文藹中
和之氣圭璋特達當徑薦於圓立車路逶遲姑安行於
通道屬聞擢序良穆師言蓋聲名積日以昭彰故英俊
望風而傾附損受以益茲可友三官惟其人固皆第一
某適叨載筆偶際登瀛墜旣長牋愧執謙之太過披觀
健論嘆陳義之彌高感服交深叙陳難盡

回周廣州自強啟

策勛南海晉職西清喜動羊城光騰犧畫共惟某官節
搯似舅廉清得君度梅嶺以分麾坐閱四年之久望松
門而次對超居六閣之先既丕輯於民庸即遙歸於帝
所某方圖馳慶先辱飛文佩謙施之勤渠撫懦衷而愧
感

回葉校書山啟

伏承翰墨策勛鉛黃分職動諸儒之欣艷指夷路以騰
驤竊惟人物之盛衰實在國家之教養識其大者則方
寸之木可高於岑樓斷而小之則九仞之山或虧於簣
土故本朝重館閣之選為當世儲公卿之材必作成於

閒暇之時乃獲用於馳驅之際某官文華拔蔚志氣激
昂學有淵源嘗範模於呂氏論無駝駘由繫援於汪宗
浸更事任之繁優簡聖神之眷方為世用宜並英游緒
四部之書姑深涵於術業號萬人之傑行自見於功名
脩慶未遑貽緘先逮佩謙牧之良厚激感悰而弗諼

回中詞科周監酒洎啟

淳熙五年四月

伏承再提文筆獨冠試闈捷音一傳公論胥穆某官氣
涵溫厚識蘊通明問學淵源挹洪波於滄海詞章挺拔
鍾秀氣於赤城早收俊科思賈餘勇方其即席同志莫
不避鋒逮此擅場有司為之擊節既成名於盛旦行策

足於要津過勤踐敬之施仍叙宗盟之好藝文甚富已
漸大布之既成名譽方新更愧小冠之子夏永言欣感
交集襟襟

回姚狀元頴啟

伏承文經乙覽名冠甲科仰窺聖鑒之精俯聽輿言之
允其官氣涵溫玉質挺脩梁才華獨步於鄉閭術業先
鳴於場屋比攄素蘊奉對青箱并包乎百家諸子之長
持守以大學中庸之約多為貴者言同老氏之五千一
以貫之辭異公孫之數萬既越拘攣之表宜居俊造之
先龍首兆祥馳滄溟之驛使鯉庭拜慶破鄆水之天荒

人知稽古之榮國享得賢之福某偶陪諸彥進侍嚴宸
環漢祖之壇初莫知於韓信擢武皇之第始共服於平
津方欲馳辭遽勞枉駕勤厚更貽於盛贄感慚滋激於
懦衷

回第二人葉狀元適啟

伏承言合宸衷名聯舉首初傳臚唱大契輿情某官賦
超邁之資濟精勤之業學術淵源乎六籍詞章馳騁乎
多聞偕俊傑以造廷悉聰明而上對切時要論自是一
家備問陳言畧無半語人或積日精思而不足我惟一
朝伏奏而有餘究觀方冊之遺文實相上下誰謂陞簾

之遠地曾不拘牽繫抱負之非常於功名乎何有某未
違展慶先辱飛文積感悚以在中豈叙陳之可究

回第三人李狀元寅仲啟

伏承拔尤蜀道得雋漢庭魏乎鼎甲之科籍甚儒先之
譽某官材資英茂問學精深慶本家餘繼夜光之迹作
美由世濟騰鼉采之輝華萬里賓王一心寤主謂求速
成者無遠畧而顧近憂者虧永圖對揚大問之教條理
明而瞻申獻斷章之十語意婉而忠既蒙親擢於軒墀
即並英游於館殿某猥由膚淺預聽臚傳象應三魁共
喜去天之適祥開五色原緣知賦日之工高誼不遺長牋

先逮其為欣感交集襟襟

回趙正字彥中仲啟

茲承發揮鴻筆是正秘文榮動金闈光騰玉牒惟本朝
重館閣之選蓋列聖儲經綸之才粵自中興以來間求
公族之雋若乃網羅於科目策試於禁嚴然後用之如
今鮮矣某官學醇文古質粹氣清事業蹈韋布之難規
模非軒冕之謂遠挹天潢之潤徑飄弱水之風群東觀
之諸儒踵西京之盛事留其真者河間得四方之書種
而別之劉歆集六藝之畧少需歲月遂立功名某朽鈍
無堪游從有賴辱長牋之俯暨數麗藻之難酬愧感交

懷指陳奚喻

除禮書兼內翰回外路啟

綴星辰之履驟被優遷窺雲霧之窓仍兼舊直冒寵靈之有赫揆庸妄以無堪恭惟某官踐履配乎先民抑揚持乎公論好謙為德行賢每戒於自賢獎善存心欲達常思於人達迄由借譽馴致增華知章兩命之榮正慚非據韋陟五雲之體過辱先施在悚感以交深豈喻言之能究

回楊正字輔啟

茲承敷納以言譽髦斯士儒林歆艷吾黨光輝竊以有

列於朝孰匪出群之雋告猷於上猶須入對之時紛百辟之斯來閱再暮而乃浹逢辰艱矣備數可乎自非深究治源力陳時事不以流俗毀譽移其守不以此身用舍貳其心則何以上不欺於吾君下無負於所學恭惟某官廉方秀傑博洽通明奏牘公車繼遺忠於棣萼陳謨諫省挹正論於冰清既自結於殊知當立登於要路尚從涵養益起聲華屬陪禁直之清嚴獲覘詞源之浩渺未遑馳慶先辱貽賤在感悚以交懷奚指陳之可喻

回江西錢運使佃啟

伏審上節閩山改轅江國按行雖舊臨遣則新恭惟某

周益公集 卷之五
官雅量鎮浮訐謨經遠偕父兄而馳譽益自弱齡兼文
行以致身允為全美踐歷夙高於中禁澄清尤著於外
臺茲屈重來旋聞愈治使乎有指務躬布於隆寬思則
無邪足坐銷於群枉惟公特立與衆背馳宜其上為神
聖之深知下使士民之信服既已續前功於一道行當
均大惠於多方某未染慶緘遽勤榮問敬佩謙虛之意
良深感悅之情

回劉饒州邦翰啟

乃者鄱陽歲惡黼座念深爰起舊人往頒寬詔恭惟某
官天資豈弟政術通明外歷劇繁所居輒治內聯侍從
厥問彌彰今以萬人之英而臨千乘之國何待席煖即
觀政成轉旱滂為豐年銷嘆愁為和氣丕輯民譽迺歸
禁途某特枉書郵愧稽慶牘感銘之至筆舌奚周

省齋文藁卷第二十五 終

省齋文集卷第二十六

周益文忠公集二十六

啟六

除參政回外路監司帥守啟 淳熙七年

居六職之先已塵高位綴三卿之後更玷殊遷揣分無堪抗顏有覲恭惟某官心存獎善志在達人力行忠恕之言兼懋謙冲之德游談所及既弗間於賢愚妙語相先更曲敦於契好載循固陋曷稱褒揚第什襲以為榮豈一言之能叙

回在外侍從啟

六曹率屬方恪守於官箴兩社通班乃與聞於國論靜

言忝冒厥有由來恭惟某官德業高明詞章偉麗赫奕
禁途之雋望中和藩服之政聲經國遠猷益屢形於奏
牘進賢雅志亦密導於宸衷是使非才獲陪共政某尚
稽往記先辱飛緘佩謙施之滋隆激感悰而無斁

回紹興張閣學子彥啟

禹會雄藩吳京近輔上求良牧今得名臣恭惟某官政
術高明儒猷敏茂籍甚兩朝之侍從卓然三鎮之藩宣
賈誼嘉謀既入陳於宣室畢公多績姑出保於東郊行
趣召還首儀禁橐帳睽違之未久屬問諭之先臨愧感
交懷敷宣莫既

回金陵范參政成大啟

乃者臨遣英望保釐別都待裴度於延英是為殊禮錫
韓侯於北闕何止路車既特開金殿之尊壘復親御石
湖之扁榜恩章加厚今昔所稀茲祭戰之肇臨宜江山
之增重恭惟某官才兼文武識洞幾微外為極方伯連
帥之權內則高論思獻納之譽自陪國論彌聳民瞻上
方規恢中原寤寐極治蕭何相漢厥由居守之勞尚父
伐商即契會朝之詠某彌年戀：一見忽：日方遡於
檣烏手已披於鯉素其為感幸未易名言

回史少傅賀冬啟

伏以臺雲紀瑞圭景踐長恭惟某官道德宗工華夷碩
望玉殿和長春之句壽同化日之舒金華敷正說之篇
道協陽文之長維師之拜指日以須某密企崇墉欣逢
令旦其為善頌莫究文陳

回福州梁丞相啟 淳熙八年

黃閣上臺將宣庭渙紫宸秘職先下璽褒是宜薄海之
交歡豈特高閣之咸喜恭惟某官事業萬夫之望文章
多士之宗以光明雋偉之資濟溫厚洪深之德事君以
道如古大臣夢帝賚予為時良弼久贊宵衣之化暫從
畫綉之遊威惠幹方兵民按堵鳩鳴雀乳田疇盡洗於

棘茨海宿山行候館何憂於盜賊緊治聲之籍甚在寵
渥以宜然裴度來朝方益彰於勛德次公復相豈或減
於功名某嘗布慶儀未修公禮茲遠勤於大貺茅增愧
於懦衷暑令方中燕臺多暇冀謹寢饗之節永垂夷夏
之休

回婺州蕭侍郎燧啟

涓選休辰奉宣寬詔光騰星婺潤浹日畿恭惟某官巍
登雋科允蹈賢檢士服純誠之節朝推忠讜之名義冠
久踐於華途彌彰乃眷紆組方榮於故里已輟于蕃看
即政成式適王覲其夙親道誼稍潤聲猷及未容投劾

之時尚獲贊登庸之喜茲酬執訊併致忱言

回遂寧李侍郎燾

上眷舊德制臨大藩當印綬之被躬已歡謠之浹境恭惟某官全蜀先進中朝老成學術貫串乎古今才名赫奕于中外慨念俗吏罔思治原視民瘼而弗求縱吏姦而莫問惟公久陪帝幙既已知德意志慮之詳乃今密接鄉邦必將暨中和布宣之譽佇頌漢璽歸侍虞廷念脩慶之未遑辱貽緘之先逮其為感悚未易名言

回贛州劉學正顯啟

誕頌新組起鎮舊邦民吏歡迎神明欣相恭惟某官懿文華國直道事君八座升班久榮曳履三刀協夢游屈分符惟昔潁川最稱黃霸粵若再臨之日居然愈治之聲旋被璽褒入陪禹路孰增光於漢事諒復見於聖朝曾修慶之未遑辱貽緘之先逮其為愧感罔改名言

回陳侍郎巖肖啟

綴前凝之列未著新功策太史之勲乃甄舊績周章拜命俯仰懷慙恭惟某官禁路老成儒林先進文推巧手碩縮於袖間名冠善人宜優於天下不鄙踈慵之品每存獎與之心逮此叨踰借之褒飾正辭直筆慙無補於汗青俊語名章幸獲窺於尺素其為感刻豈易名言

回齊侍郎慶曾啟

欽承茂渥起領真祠既享宸知亦榮親養恭惟某官鍾
英海岱被遇冕旒凜然柏寺之直聲籍甚荷囊之清譽
姑從雅志結壽宮香火之緣行奉除書上霄極星辰之
履方圖脩賀遽辱馳辭荷謙德之相先置感悰而無已
回單侍郎夔頌德

恭惟某官才堪盤錯識照幾微蚤蜚官路之英聲榮踐
禁途之貴仕前後與上同

回紹興府王尚書希呂啟

朝辭北闕夕鎮東藩條教一新士民胥慶恭惟某官學

該百氏氣益諸公文昌喉舌之司久隆譽處於越服肱
之郡寵寄蕃宣適一方罹水旱之災正萬乘軫旰宵之
念諒小施於政術即丕著於事功旋奉璽褒平躋鼎路
某倣違風度驟辱音郵在欣感以良深非叙陳之可究
回寧國陳舍人駸啟

君子殿邦屢聞刻贊群州承楷今喜頌條轉苛虐為中
和易嘆愁為謠頌民有所恃政其亟成恭惟某官德逸
日休道深自得臨事秉後凋之節莅官無可指之瑕紅
藥紫薇暫輟演綸之手雙溪疊嶂聊追澄練之吟惠既
浹於潛藩福自流於京邑行膺畫節入燮辰階曾脩慶

之未遑辱搢辭之先達其為愧感固罄名言

又回陳舍人賀各啟

望書雲物魯侯率屬以登臺埽設酒醴漢守移文而休
吏匪時良牧疇踵前規恭惟其官法從名高藩方課最
宣九重之盛德措一境於泰寧茂臨來復之辰即奉邁
歸之詔某欣逢令序阻慶賓筵記室傳封首勤華問道
山園拜坐憶舊遊感詠交深敷陳莫盡

回江陵趙丞相啟

伏審顯奉廷揚榮更闡制非獨化行於南國抑將威震
於北方旌纛一臨軍民交賀恭惟某官業茂夔契道傳

孔顏會千載之風雲壯九重之基業事君有道可謂大
臣應物無心是為真宰頃辭政柄往蒞藩方若稽故常
當殿近輔然考熙朝之名相率誇畫錦於故鄉所以戀
闕之念雖深而於渡瀘之行難輟逮稍移於圭齋彌注
想於冕旒爰頒易鎮之恩式示朝宗之意矧異時三國
必爭之地乃今日中原可取之途衮衣繡裳寧許姬公
之信處命珪相印行酬裴度之元功某猥辱舊知欣聞
新渥雖馳慶牘未辦公函仰謙德之過優激懦衷而增
愧其如忤躍未易敷云

回婺州洪舍人邁啟

月益公集 卷之六 六
茲審上圖舊德詔畀名藩宣美化於三朝浹歡謠於四境恭惟某官脩名蓋世亮節傳家詞章獨步於西垣仁愛躬行於兩郡適東陽之調守契中宸之思賢爰出左符起臨右輔揚仁風於黎庶視古無慚蒙河潤於京師繼今有望少需報政即慶為公某方治書郵已勤緘翰其如欣感未易敷云

回陳給事覲啟

茲審茂隆睿眷榮踐祠庭雖才業淹留深鬱朝紳之望而里閭燕息殆同晝繡之遊恭惟某官學術傳家風猷蓋世版曹瑣闥並高獻納之聲吳會少城交著蕃宣之績姑從均逸行慶適歸某方欲馳辭已勤枉問其為欣感罔既敷陳

回婺州洪舍人邁謝進職啟

恭審疏榮芝檢候對松門旌法從之舊勞賁藩方之新渥恭惟某官名高夷夏氣塞天淵早被遇於宸旒久升華於禁索由三字畀集賢之職雖用前規通二年躋內閣之班抑存故實而淹屈殆更於五閏且蕃宣存歷於三州傲聞褒重之頒咸謂除書之晚參裁機政已簡淵衷剴矜驕兵諒為餘事某閭嘗修慶尚阻馳牋辱盛禮之來臨愧前儀之太畧其為欣感未易敷云

周益公集 卷之六 七
回鎮江錢叅政良臣啟

淳熙九年

茲審起從綠野往鎮朱方千騎一臨群情胥慶恭惟某
官才宏而德備學粹而文雄天子以為通儒國人僉曰
良弼茂摠經濟之術久著贊襄之功將遂冠於台衡乃
漸儀於岳牧昔以王人總餉已得軍民之歡今由政路
分符宜增瘵戟之重適千里游飢之後正九重旰食之
時條教甫頒顧憂頓釋傾耳袴襦之詠指期袞繡之歸
某方治書郵首勤緘翰深佩撫謙之施難施愧汗之顏
氣序益暄撫綏多暇願精調於鼎養以大慰於巖瞻

回隆興留尚書正啟

伏審群州承楷愈治於贛川十國為連就升於督府恩
榮異甚謠頌歡然恭惟某官端重以文溫良而毅銀臺
畫省久潤步於禁嚴黃閣紫樞將平躋於輔弼倏念專
城之樂屢分制閫之權惟皇眷之舊紆且民瞻之素具
政將焉避公可適歸某方治書郵已勤緘翰仰謙恭之
過厚顧遲鈍以知非其在感藏曷勝言喻

除知院回外路啟

督綱條於外已叨承轄之聯參籌畫於中更忝樞機之
任惟聖主宵衣之際豈庸夫高枕之時必能兼文武之
資乃可重東西之府寧容腹背之辭輒預股肱之良揣

分無堪拜恩有覲茲蓋某官儒林領袖禁路羽儀典治
民藩專布愛民之政揄揚善類用為報國之忠遂使陳
人游承新渥某方期廷謝即注郵籤辱大旼之先臨愧
小才之不敏其為感荷罔既敷陳

答福州趙侍郎汝愚

茲承被命典藩涓辰開府雖禁路輟直臣而去天意憮
然想海邦聞良牧之來人心悅甚恭惟某官道窺聖秘
名冠時髦正若孟軻切：異端之闢忠如劉向拳：同
姓之親方謀帥之孔艱顧在廷而莫可徒得汲卿之重
式適申伯之行既有兵民宜恩威之兼濟寧無政事使
財用之頓寬以公之才足辦乃事少須報政便合賜環
某方企聲猷忽勤緘翰其為欣感交集襟臆

回太平州木庵事待問啟

淳熙十年

茲承均勞禁路分鎮當塗民吏交懽江山增重恭惟某
官名高多士忠結九重嚴徐義理之文久殫猷告召杜
循良之守看即政成况榮奉於親庭實增光於郡紱某
尚稽馳慶先辱飛緘欣感交懷叙陳曷既

答史太保浩謝致仕啟

恭審疊貢封章懇還官政升上公之秩序荒全魏之土
田在耆儒則敦止足之風於聖主則極褒崇之禮典冊

既下簡編有光君臣之間可謂兩得中外之衆固宜交
懽恭惟某官造道淵深宅心廣大學無不通故見之著
述者多而益辨氣有所養故施之事為者久而益新兩
持一相之權歷踐三孤之貴視物猶己愛憎泯然毋我
負人忠恕多矣是宜壽考康寧而天不靳功名終始而
人不疑逮辭寵利以弗居愈覺身名之俱泰召公為保
雖厥位之已同尚父維師顧其年之未至况舊勤於分
陝恐終佐於伐商某早托甄陶喜揚綸綍非敢緩屢成
之賀謂當循廷謝之規今觀宸章果符輿望惟是先施
之辱寧無倒置之慙迎拜匪遙欣愉更切

回金陵錢叅政良臣啟

參於金鉉昔倚燮調佩以玉麟今勞居守江山增重吏
士均歡恭惟某官孝友根心忠嘉致主學術淵源乎游
夏勲庸亞匹於管簫望實孔昭簡知彌渥惟潤昇之大
府乃江浙之輿區並列雲屯俱為天塹然而留都非他
鎮之比管鑰異左符之分將期北顧之寬爰籍東郊之
保去思來暮兩邦謠頌之交興錢舊迎新二境旌旗之
相接若時壯觀實掩前聞少需坐席之溫旋聽堤沙之
築某嘗馳慶問過沐華緘佩雅瞻之滋隆愧前儀之太
簡其為悚荷難盡名言

回靜江詹侍郎儀之啟

進班書殿出鎮帥垣以法從之名臣臨皇華之舊部上
寬帝顧下愜輿情恭惟某官學造聖真才周世用久迴
翔於遠使宜容與於近班意在本朝固當殫辰猷而告
於后躬行君子又欲推惠澤而加乎民惟通商則疲此
可蘇惟崇儉則經費自足既康五管即綴四鄰某方欲
馳辭遽蒙枉問其為欣荷未易名言

回紹興府鄭尚書丙啟

易麾藩輔浹潤帝畿聳威望於十連寬顧憂於九陸恭
惟某官孤忠自信與學躬行方榮畫繡之歸俄厚宵衣

畫繡見防考

之眷析圭清白堯天無尺五之遙佩印銀黃漢石有肆
千之重諒甫頒於條教即登拜於凝丞某特枉書郵仰
銜謙柄日俟遙歸之詔坐深善頌之誠

回太平州廬州池州賀冬啟 淳熙十一年

考易而測天心既占七日之復登臺而觀雲氣又卜一
年之豐惟時侷藩宜集嘉祉恭惟某官道隨剛長德配
陽新推惠澤而加之民歛休祥而萃乎已坐迎令序行
陟近司某方治書郵遽勤緘翰永言感頌交集襟襟

回陳丞相謝除少保啟

廷揚制麻位進孤棘既表弼諧之舊德亦酬鎮撫之新

功上眷加隆輿情交慶恭惟某官學克天性忠締主知粹然道德之容足消鄙薄籍甚廟朝之望坐鎮華夷釋相印者十年剖藩符於兩鎮保衡之拜聖意可知台衮之歸人心共徯故先以右遷之寵即繼之左揆之除某久荷殊憐欣聞異數雖敬伸於慶禮曾未達於公函茲屈尊崇過形謙抑三復第深於悚抃片言莫寫於勤誠

回靜江詹侍郎謝轉官啟

茲承寵頒異數榮陟崇階既酬談經儲禁之前勞亦用增秩璽書之故事恭惟某官學窺聖域德冠民彝入綴嚴徐罄朝夕論思之益進陪園綺究春秋筆削之嚴逮

講堂甫告於終篇適邊閫亦當於進律式旌儒效彌壯戎昭特枉華緘倍形厚禮雖佩有加之意豈勝不敏之慙

回廬州王尚書太平州陳舍人池州陳尚書泉

州司馬侍郎賀正啟 淳熙十二年

春王三朝天地交泰若昔論思之舊為今慈惠之師茂履端辰允綏繫祉恭惟某官行遵賢檢功考民庸奉順陽和式應發生之序敷宣上德毋違寬大之書享厚福以難量酌輿言而易見其方脩尺牘遽枉華緘佩謙施以滋深叙感悰而莫究

回靜江詹侍郎謝降詔獎諭啟

茲者蒙鑾底定漢詔誕頒煥綸縉之溫言獎詩書之良帥寵光厚甚中外榮之恭惟某官道可覺民武能威敵自鎮臨於交廣每綏靖於封圻蠹彼無良敢茲負固方調兵而薄伐俄折馘以趣降下十行一札之褒酌三令五申之績蓋賞勸難同於將士惟璽書可示於眷懷稽本朝優異之恩舉近歲濶疎之典風傳郡國名震華夷某托契至深窺文竊抃愧馳辭之未果荷貽問之相先欣感交懷喻言曷究

回隆興程給事叔達啟

升華論撰申命蕃宣已跬步於西清尚旃幃於南國搢紳喜劇民吏歡騰恭惟某官昭代通儒周行先進伏蒲視草凜然風烈之高持節擁麾籍甚威聲之著雖再留於蔡戟實妙簡於宸旒况甲午之題名有莆陽之近事由貼職而候松門之對旋賜環而躋荷橐之班遂以歲中參於端右既前政規摹之具在則後賢進用以何疑某苟未汰歸深期晤語茲敬酌於公禮殊未究於私誠

回太平州陳舍人駉啟

優考民功寵升書殿詔除甫下輿論交歡恭惟某官勁節端朝懿文華國禁路罄論思之益江圻蜚豈弟之毅

承水潦之餘災著農田之顯效併酬久次特茂殊恩由
三字而貽集仙自存故事通二年而升次對抑有成規
嗣奉璽褒遂參枋任某苟追汰斥尚期晤言茲形拙訥
之辭敬答緘封之既其為欣感未易敷云

回成都留學正敷啟

峻學士之班仍行臺之寄訖寬西顧實兆東歸恭惟某
官仁義被躬忠嘉致主自綴尚書之履屢開刺史之天
竭鎮坤維尤高治最粵若張忠定之定與夫趙清獻之
清人之所難公則甚易此遐方所以借留而莫肯捨聖
主所以因任而不忍違然弼諧之功急於蕃宣左右之
助重於遠外竊窺虛佇看即延登某比勤萬里之書深
愧一謙之德永言欣荷難盡敷陳

答陳給事峴啟

閨臺宿望久跋逆歸香火勝緣力祈因任雅懷雖愜輿
論則那恭惟某官天賦宏才家傳與學入侍得論思之
體出藩收牧御之功從容祠館之游繾綣鄉閭之樂備
臻百順坐閱三年袂挹浮立自為謀則善矣席前宣室
將有問焉就之某遠辱長牋備知厚眷其為欣感未易
敷云

賀梁觀文克家年啟

淳熙十三年

伏以象測璿璣斗柄肇回於蒼陸氣和玉燭春風初入
於東郊若時宗工宜介丕祉恭惟某官調元道著宰物
功成暫釋政機日罄謀猷之告茂臨歲旦時臻備順之
全方當感會於風雲迄賴平章於軍國某遲聞受謁即
冀造門頌詠攸深叙陳莫喻

回陳丞相俊卿謝致仕啟

伏承連章請老優詔閑勞執皮帛於新班位隆亞傅易
茅封於舊鎮地統故鄉仍秘殿之大名極宗工之異數
播紳創見夷夏樂聞恭惟某官德博而裕於才器闔而
冲於用以奧學高文冠多士以忠言直節居大僚為善

未嘗近名而聲譽之歸不可遏事君未嘗枉道而爵祿
之至不可辭周旋鈞樞弼亮神聖謀斷兼乎房杜都俞
踵乎皋夔粵去廟堂屢臨藩屏力方剛而抗疏欲追六
一之高風年甫及而掛冠迄遂祁公之雅志優游里第
涵泳天真二疏賓客之相娛萬石子孫之甚謹謙佩六
爻之吉悔吝不生壽居五福之先康強未艾在前輩或
難於盡善惟哲人獨享其全功然而尚父之佐武王潞
公之師元祐皆來歸於既老豈得謝之可拘公固無心
上猶有望其敬懷知己喜聽傳家顧希驥以未能思執
鞭而甚切仰勤紫闕徒激懦衷寒律方凝燕超多助冀

益調於鼎食永丕聳於民瞻

回池州陳尚書良佑啟

光膺芝檢載剖竹符師帥得賢軍民致喜恭惟某官懿
文華國直道端朝身雖遠於禁嚴望益傾於中外用詞
臣而作牧姑重九華選刺史而為公即歸兩社某近違
風度尚曠書郵辱榮問之相先愧慶儀之不敏其如欣
頌莫究敷陳

回靜江詹待制儀之啟

茲承奏功南國加職西清正侍從之魏班表蕃宣之異
等恭惟某官性資端諒學識高明以愛人利物之心行
尊主庇民之術久臨遐服迄著多庸身正令從允謂必
躬之效政脩用足宜還既庶之風姑次對於松門即延
登於槐路某雖馳慶牘未辦公函辱厚禮之先施激懦
衷而愧甚其為欣感未易殫論

回富沙陳待制良佑啟

比審政成江國制易閩邦繫事任之加隆知眷懷之益
厚恭惟某官提身敬簡蹈德中和富華國之文章蘊康
時之術業入儀禁路播紳傳鯁挺之言出剖州符襦袴
洽撫摩之譽乃眷初潛之鎮復煩次對之賢公既樂其
土風民尤安於德化正惟宿望久合登庸曾是藩方固

難歛惠某尚稽慶牘已拜公函荷謙施之相先激感悰
而無已

回程待制叔達啟

升華次對因任初潛觀播紳相賀於朝知父老交歡於
外恭惟某官德猷粹穆治行循良詞章為儒者之宗政
術作藩侯之冠雖少稽於趣召實深簡於淵衷昔炎漢
之中興有孝宣之極治若時黃霸久在潁川旋酬累歲
之勞入踐三公之位上方稽古公且錫還既異時善頌
之言信而有證則後日登庸之兆理在不疑况採之士
夫議論之公必勝彼巫史揣摩之語因酬緘既併致誠

祈疑沍在辰鎮臨多暇願謹養頤之節益綏視履之祥

省齋文稿卷第二十六 終

--	--	--	--	--	--	--	--	--	--	--	--	--	--	--	--	--	--	--	--	--



